

佛
教
聖
典
之
二

修
持
篇

上海佛學書局印行

佛
之
聖
修
典

持

篇

№ 47335

例言

一、佛經廣瀚，至難遍讀；例如大寶積經一百二十卷，華嚴經六十卷，大集經四十卷，中阿含經六十卷，增壹阿含經五十一卷，雜阿含經五十卷，十誦律六十一卷，四分律六十卷；以上各經，讀其一部，已屬甚難；况全部乎。本書即取一百八十部之大小乘經典，節錄其要文，而分類編輯之。讀此一書，於量的方面，即得以窺一切佛經之津要；於質的方面，即得以明全部佛經之教義，修持，世道之大綱要領。故此書之內容，亦得稱爲「諸經要集」，亦得稱爲「佛教概說」焉。

一、本書內容，分爲教法、修持、世道三篇；更於各篇中，分若干章節。第一教法篇，專述佛教之法義；所謂佛教教法宇宙觀、人生觀，悉皆於此具備。謂之爲「佛教教理概說」，亦可也。然雖明理而不實行，則如有目無足；故更於第二修持篇中，專述佛教徒修持之軌則；凡佛教之信願觀行，莫不集錄。謂之爲「佛教修行概說」，亦可也。以上二篇，係對已入佛門者言；至若普通世人之立身處世，對己對人之道，則佛陀垂訓，亦復周詳；故更於第三世道篇，專述佛教爲人處

世之道，凡吾人行已待人對社會家國之聖訓，亦罄無不盡。謂之爲「世道格言」亦可也。一、教法篇中，分爲佛陀法、萬有衆生之四章。原擬別立心之一章，後以此義攝於萬有章中，慮其重複，故略去之。第一佛陀章，由歷史的釋尊，而及於佛身論要義之二身、三身說。第二法章，由四諦十二因緣，而及於三乘一乘之說。第三萬有章，分爲緣起與實相之二大節目：緣起節下，又分爲業感緣起，唯心緣起，賴耶緣起三項。由業報思想，如來藏思想，而至阿賴耶識，最後更及賴耶與如來藏之關係，卽心之問題，亦羅於其中。實相節下，由萬有正觀之空，無我，進而及於不二之實性，不二實性之真如法界，一心與萬有之關係，乃至於萬有之二諦、三諦、一諦爲終極焉。第四衆生章，則自人生行相之無常苦，而及其原因之煩惱，與無常苦之輪迴，並轉而觀述平等之佛性，最後復推究於本來成佛之極地焉。

一、脩持篇內，分發心、行道、內觀、世道與佛道四章。第一發心章，由三寶歸依，乃至發心聞法。第二行道章，由發願求道，乃至八正道，六波羅蜜。第三內觀章，由冥坐靜觀，乃至觀佛見佛。第四世道與佛道章，由三解脫門，而及於菩提涅槃，煩惱與菩提，生死與涅槃，世道與佛道之關係，而

另開修道之生活。於中善知識一節，又可屬於行道章；內觀章亦可視為行道之一部；又如菩提涅槃，或可屬於教法篇中之佛陀章；以其為修道之標的，故揭於此篇，較為適當。又此行道中，有布施，有忍辱；世道篇之師友中，亦有慈忍，有施捨；外觀上似嫌重複，實則行道中之布施、忍辱，為六波羅蜜中之一，以菩提為目標之修道要目也。師友中之慈忍施捨，為日常生活之德義也。故特區別於兩處出之。

一、世道篇分持身之道，對人之道二章。第一持身之道章中，又分內省、進德、節制、經濟之四項。第二對人之道章中，則分家族、師友、社會之三項。又持身章中如戒瞋、慎言、廉潔、分財，亦含有對他的意義；但以其為自己主要之德義，故列之於持身道中。

一、本書之略註，僅於辭語之表面上，略舉其名數；并為節省篇幅計，敘述甚簡；若欲廣求之，則佛學書局尚有各種佛學辭典，可備參考也。

一、本書所引據之經典，以頻伽精舍本大藏經為根據。此中所引據之經律，凡百八十部；於本書正文中，均皆註明其出於頻伽藏中之卷帙番號與頁數左右，以便閱藏者之檢查。

一、本書所引據之經典，遍於大小乘經律各部。今分別順序列之如次：

小乘經典

- 一、佛傳——因果、中本起之兩經，因敍載佛之史傳，故首舉之。
- 二、雜、中、長、增、壹之四阿含經及其異譯。
- 三、法句、出曜、四十二章等集錄之經。
- 四、小乘諸小部經。
- 五、百喻、雜寶藏、那先等撰述之經。

小乘律

四分、五分、十誦、僧祇、沙彌諸律。

大乘律

梵網、瓔珞、佛藏、優婆塞、法律三昧諸經。

大乘經典

一、大品小品、金剛、仁王、天王、理趣諸般若經。

二、維摩、思益、諸法無行、首楞嚴、三昧、坐禪、三昧之般若經系諸經。

三、法華及其眷屬經。

四、華嚴及其眷屬經。

五、大般涅槃經。

六、如來藏、勝鬘、無上依深密、楞伽、密嚴、占察、圓覺、楞嚴等如來藏阿賴耶識之諸經。大日經亦附之。

七、大寶積及其異譯。惟勝鬘經以內容關係上，列於如來藏系。

八、大集及其異譯。眷屬經中，惟占察經以內容關係上，列於如來藏系。

九、觀佛三昧、華手、藥師、金光明、心地觀諸經。及諸大乘小部經。

編者識

本書引據之經典 根據頻伽精舍本大藏經

經	典	卷數	譯者	帙冊號碼
一、過去現在因果經		四	宋·求那跋陀羅	辰十
二、中本起經		二	後漢·曇果共康孟詳	辰十
三、轉法輪經		一	後漢·安世高	辰六
四、大般涅槃經		三	東晉·法顯	辰十
五、佛般泥洹經		二	西晉·白法祖	辰十
六、遺教經		一	後秦·鳩摩羅什	辰十
七、雜阿含經		五十	宋·求那跋陀羅	辰二一四
八、別譯雜含經		十六	失譯	辰五
九、雜阿含經		一	失譯	辰六

二〇、中阿含經	六十	東晉·瞿曇僧伽提婆	是五—七
二一、七知經	一	吳·支謙	是八
二二、恒水經	一	西晉·法炬	是八
二三、阿那律八念經	一	後漢·支曜	是八
二四、善生子經	一	西晉·支法度	是八
二五、長阿含經	二十二	後秦· <small>佛陀耶舍共竺佛念</small>	是九
二六、尸迦羅越六方禮經	一	後漢·安世高	是十
二七、佛開解梵志阿毘經	一	吳·支謙	是十
二八、增壹阿含經	五十一	東晉·瞿曇僧伽提婆	是十一—十三
二九、施食獲五福報經	一	失譯	是四
三〇、玉耶女經	一	失譯	是四

三、法句經	二	吳·維祇難等	藏六
三、法句譬喻經	四	晉·法炬共 法立共	藏六
三、出曜經	三十	姚秦·竺佛念	藏五—六
二、法集要頌經	四	宋·天息災	藏六
二、本事經	七	唐·玄奘	辰六
二、燈指因緣經	一	後秦·鳩摩羅什	宿七
二、八師經	一	吳·支謙	宿七
二、出家緣經	一	後漢·安世高	宿八
二、佛醫經	一	吳·竺律炎共 支越共	宿八
三、旃陀越國王經	一	宋·沮渠京聲	宿七
三、譬喻經	一	唐·義淨	宿八

佛教聖典 本書引據之經典

四

三、阿含正行經	一	後漢·安世高	宿八
三、所欲致患經	一	西晉·竺法護	宿八
三、進學經	一	宋·沮渠京聲	宿八
三、因緣僧護經	一	失譯	宿八
三、諸德福田經	一	西晉·法立 法炬共	宿八
三、堅意經	一	後漢·安世高	宿八
三、正法念處經	七十	元魏·瞿曇般若流支	宿一—四
三、妙法聖念處經	八	宋·法天	宿五
四、阿難問事佛吉凶經	一	後漢·安世高	宿六
四、自愛經	一	西晉·竺法護	宿七
四、羅云忍辱經	一	西晉·法炬	宿七

四、五苦章句經	一	東晉·竺曇無蘭	宿八
四、四自侵經	一	宋·法天	宿八
四、分別善惡所起經	一	後漢·安世高	宿六
四、罵意經	一	後漢·安世高	宿八
四、賢愚經	一	元魏·慧覺等	宿九
四、分別經	一	西晉·竺法護	宿八
四、孝子經	一	失譯	宿八
四、父母恩難報經	一	後漢·安世高	宿八
三、未曾有因緣經	二	蕭齊·曇景	宿八
三、忠心經	一	東晉·竺曇無蘭	宿八
三、辨沙王五願經	一	吳·支謙	宿七

四、未生冤經	一	吳·支謙	宿七
五、末羅王經	一	宋·沮渠京聲	宿七
五、罪福報應經	一	宋·求那跋陀羅	宿六
五、五無反復經	一	宋·沮渠京聲	宿七
五、處處經	一	後漢·安世高	宿六
五、七處三觀經	一	後漢·安世高	辰六
五、生經	五	西晉·竺法護	宿五
六、金色童子因緣經	十二	宋·惟淨等	宿七
六、光明童子因緣經	四	宋·施護	宿六
六、四十二章經	一	後漢·迦葉摩騰 竺法蘭共	藏五
六、三慧經	一	失譯	藏八

五、百喻經	四	蕭齊·求那毘地	藏八
六、孝經抄	一	吳·支謙	宿八
六、雜譬喻經	一	失譯	暑七
六、選雜譬喻經	二	吳·康僧會	暑七
六、天尊說阿育王譬喻經	一	失譯	藏八
七、那先比丘經	二	失譯	藏八
七、四分律	六十	姚秦·佛陀耶舍共 <small>竺佛念</small>	列三一六
七、五分律	三十	宋·佛陀什共 <small>竺道生</small>	張一一二
七、十誦律	六十一	後秦·弗若多羅什共	張三一七
七、摩訶僧祇律	四十	東晉·佛陀跋陀羅共 <small>法顯</small>	列八一十
七、沙彌十戒法并威儀	一	失譯	寒十

六、梵網戒經	二	後秦・鳩摩羅什	列一
七、菩薩瓔珞本業經	二	姚秦・竺佛念	列一
六、佛藏經	三	姚秦・鳩摩羅什	列二
五、優婆塞戒經	七	北涼・曇無讖	列二
八〇、法律三昧經	一	吳・支謙	列二
八一、摩訶般若波羅蜜經（小品）	二十七	後秦・鳩摩羅什	月三十四
八二、般若波羅蜜經（小品）	十	後秦・鳩摩羅什	月六
八三、文殊般若經	二	梁・曼陀羅仙	月九
八四、金剛般若經	一	姚秦・鳩摩羅什	月九
八五、仁王般若經	二	姚秦・鳩摩羅什	月九
八六、勝天王般若經	七	陳・月婆首那	月八

八七、理趣六波羅蜜多經	十	唐·不空	閏十五
八八、維摩經	三	後秦·鳩摩羅什	黃七
八九、思益梵天所問經	四	姚秦·鳩摩羅什	宇一
九〇、文殊支利普超三昧經	三	西晉·竺法護	宇八
九一、大方廣寶篋經	三	宋·求那跋陀羅	宇十
九二、諸法無行經	二	姚秦·鳩摩羅什	宇二
九三、首楞嚴三昧經	二	後秦·鳩摩羅什	黃七
九四、坐禪三昧經	二	姚秦·鳩摩羅什	暑六
九五、妙法蓮華經	七	後秦·鳩摩羅什	盈一
九六、觀普賢行法經	一	宋·曇無蜜多	盈四
九七、無量義經	一	蕭齊·曇摩伽陀耶舍	盈一

九六、大薩遮尼乾子所說經	十	元魏・菩提留支	盈四
九九、華嚴經	六十	東晉・佛馱跋陀羅	天七—九
一〇〇、如來興顯經	四	西晉・竺法護	天十
一〇一、度世品經	六	西晉・竺法護	天十
一〇二、大般涅槃經	四十	北涼・曇無讖	盈五—六
一〇三、如來藏經	一	東晉・佛馱跋陀羅	宇三
一〇四、勝鬘經	一	宋・求那跋陀羅	地十二
一〇五、菩薩瓔珞經	十四	姚秦・竺佛念	宇四
一〇六、無上依經	二	梁・真諦	宙七
一〇七、解深密經	五	唐・玄奘	黃八
一〇八、楞伽經	四	宋・求那跋陀羅	黃六

一九、入楞嚴經	七	唐·實叉難陀	黃六
二〇、密嚴經	三	唐·地婆訶羅	黃八
二一、大乘顯識經	二	唐·地婆訶羅	地十二
二二、佛地經	一	唐·玄奘	黃八
二三、金剛三昧經	一	失譯	盈四
二四、占察善惡業報經	二	隋·菩提燈	玄十
二五、圓覺經	一	唐·佛陀多羅	天十一
二六、首楞嚴經	二	後秦·鳩摩羅什	黃七
二七、大日經	七	唐·輸波迦羅	閏一
二八、摩訶摩耶經	二	蕭齊·曇景	盈十
二九、廣博不退轉法輪經	六	宋·智嚴	盈三

三〇、蓮華面經	二	隋・那連提耶舍	盈十
三一、大寶積經	一百二十	唐・菩提流志	地一—六
三二、無量壽經	二	曹魏・康僧鎧	地八
三三、阿彌陀經	一	姚秦・鳩摩羅什	地十二
三四、觀無量壽佛經	一	宋・畺良耶舍	地十二
三五、毗耶娑問經	二	元魏・瞿曇般若流支	地十二
三六、父子合集經	二十	宋・日稱等	地十
三七、大乘十法經	一	梁・僧伽羅婆	地八
三八、大集經	六十	北涼・曇無讖	玄一—四
三九、寶女所問經	四	西晉・竺法護	玄五
四〇、大集經賢護分	五	隋・闍那崛多	玄九

一三二、地藏十輪經	十	唐・玄奘	玄七
一三三、地藏菩薩本願經	二	唐・實叉難陀	閏十
一三三、大集譬喻王經	二	隋・闍那崛多	玄九
一三四、般舟三昧經	一	後漢・支婁迦讖	玄九
一三五、自在王菩薩經	二	姚秦・鳩摩羅什	玄九
一三六、僧伽吒經	四	元魏・月婆首那	玄九
一三七、觀佛三昧海經	十	東晉・佛陀跋陀羅	黃五
一三八、寶雨經	十	唐・達磨流支	宇六
一三九、海龍王經	四	西晉・竺法護	宇九
一四〇、華手經	十	後秦・鳩摩羅什	宇五
一四一、悲華經	十	北涼・曇無讖	宙三

一四三、藥師如來本願經	一	隋·達摩笈多	黃四
一四四、金光明最勝王經	十	唐·義淨	黃九
一四四、心地觀經	八	唐·般若	字二
一四五、賢劫經	八	西晉·竺法護	黃四
一四六、大方等頂王經	一	西晉·竺法護	黃八
一四七、大方廣如來秘密藏經	二十	失譯	字十
一四八、持世經	四	姚秦·鳩摩羅什	字十
一四九、法集經	六	元魏·菩提流支	字七
一五〇、十住除垢斷結經	十	姚秦·竺佛念	字三
一五一、採花違王上佛受決號妙華經	一	東晉·竺曇無蘭	宙七
一五二、德護長者經	二	隋·那連提耶舍	宙六

一五三、阿闍世王授決經	一	西晉·法炬	宙七
一五四、莊嚴菩提心經	一	姚秦·鳩摩羅什	黃十
一五五、老女人經	一	吳·支謙	黃五
一五六、菩薩投身餓餓虎起塔因緣經	一	北涼·法盛	黃十
一五七、無字寶篋經	一	元魏·菩提流支	宇三
一五八、如來莊嚴智慧光明入一切佛境界經	二	元魏·曇摩流支	宇三
一五九、孟蘭盆經	一	西晉·竺法護	宙六
一六〇、佛爲勝光天子說王法經	一	唐·義淨	宙六
一六一、辯意長者子經	一	後魏·法場	宙八
一六二、大乘造像功德經	二	唐·提雲般若	宙七
一六三、菩薩本行經	三	失譯	宙五

一六四、金色王經	一	東魏·瞿曇般若流支	宙五
一六五、大方便佛報恩經	七	失譯	宙五
一六六、演道俗業經	一	乞伏秦·聖堅	宙七
一六七、出生菩提心經	一	隋·闍那崛多	宙二
一六八、六度集經	八	吳·康僧會	宙五
一六九、菩薩睺子經	一	闕譯	宙五
一七〇、太子慕魄經	一	後漢·安世高	宙五
一七一、佛昇忉利天爲母說法經	三	西晉·竺法護	宙六
一七二、德光太子經	一	西晉·竺法護	宙六
一七三、大意經	一	宋·求那跋陀羅	宙六
一七四、魔逆經	一	西晉·竺法護	宙二

一七五、須真天子經	四	西晉・竺法護	宙二
一七六、大法炬陀羅尼經	二十	隋・闍那崛多等	宙九
一七七、佛爲優填王說王法政論經	一	唐・不空	閏十五
一七八、菩薩內習六波羅蜜經	一	後漢・嚴佛調	藏五
一七九、大乘緣生稻稊喻經	一	唐・不空	閏十五

佛教聖典 本書引據之經典

一八

佛敎聖典之二 修持篇 目錄

第一章 發心

頁數

(一) 歸依三寶·····	(一)
(二) 歸依佛·····	(五)
(三) 歸依法·····	(八)
(四) 歸依僧·····	(一三)
(五) 信心·····	(一七)
(六) 懺悔·····	(二五)
(七) 供養·····	(二六)
(八) 菩提心·····	(三四)
(九) 善知識·····	(四五)

(十) 聞法……………(五三)

(十一) 法味……………(六一)

第二章 行道

(一) 發願……………(六四)

(二) 求道……………(六九)

(三) 行道……………(七四)

(四) 八正道……………(七九)

(五) 六波羅蜜……………(八二)

(六) 般若……………(八八)

(七) 布施……………(九三)

(八) 持戒……………(一〇七)

(九) 忍辱……………(一一三)

(十) 精進……………(一一五)

第二章 內觀

(一) 冥坐……………(一二〇)

(二) 制心……………(一二二)

(三) 觀心……………(一二五)

(四) 淨心……………(一二八)

(五) 無住心……………(一三〇)

(六) 念佛……………(一三二)

(七) 觀佛……………(一三七)

(八) 觀衆生……………(一四一)

第四章 世道與佛道

(一) 三解脫門……………(一四五)

(二) 解脫·····	(一四九)
(三) 菩提·····	(一五一)
(四) 涅槃·····	(一五五)
(五) 煩惱與菩提·····	(一五九)
(六) 生死與涅槃·····	(一六五)
(七) 世道與佛道·····	(一六七)
(八) 脩行生活·····	(一七〇)
甲 願行具足·····	(一七〇)
乙 信行並修·····	(一七六)
丙 日常用心·····	(一八二)
丁 傳道·····	(一八五)

佛敎二聖 修持篇

第一章 發心


(一) 歸依三寶

五戒三歸

給孤獨氏居士復問：「初學道者，始以何志？」

佛言：「先習五戒，自歸於三。何謂五戒？一曰慈心，恩仁不殺。二曰清廉，節用不盜。三者貞良，鮮潔不染。四曰篤信，性和不欺。五曰要達，志明不亂。何謂三自歸？一曰歸佛，無上正真。二曰歸法，以自御心。三曰歸衆，聖衆之中，所受廣大，猶如大海，靡所不包。」

（演道俗業經）宙七_{二三}左



三自歸

自歸於佛；當願衆生，體解大道，發無上意。自歸於法；當願衆生，深入經藏，智慧如海。自歸於僧；當願衆生，統理大衆，一切無礙。

（華嚴第六淨行品）天七_{二九}左

在家菩薩之三歸

佛言：「長者！在家菩薩，應歸依佛，歸依法，歸依僧。以此三寶功德，回向無上正真之道。」

長者！云何在家菩薩歸依於佛？我要得成於佛身，三十二相以自莊嚴；持此善根，集三十二丈夫相；爲集此故，勤行精進。長者！是名在家菩薩歸依於佛。

長者！云何在家菩薩歸依於法？長者！而是菩薩，恭敬於法，及說法者。爲法欲法，樂法極樂，助法住法，持法護法，堅住於法，讚歎於法，住於法行，增法求法，以法爲力，施法器仗，唯法爲務。我成阿耨多羅三藐三菩提已，當以正法，等施一切人，天、阿脩羅、長者。是名在家菩薩歸依於法。

長者！云何在家菩薩歸依於僧？長者！若是菩薩，見須陀洹，斯陀含，阿那含，阿羅漢，及與凡夫，若見聲聞乘，皆悉敬順，速起承迎，好語善音，右繞彼人。應當如是思念：我等得無上正真道時，爲成聲聞功德利故，而演說法；雖生恭敬，心不住中。長者！是名在家菩薩歸依於僧。

復次：長者！在家菩薩，見如來已，修於念佛，是名歸依佛。聞於法已，修於念法，是名歸依法。見於如來聲聞僧已，而不忘失菩提之心，是名歸依僧。

復次：長者！若菩薩願常與佛俱，而行於施，是名歸依佛。守護正法，而行於施，是名歸依法。以此布施，迴向無上道，是名歸依僧。

（大寶積經卷第八十二郁伽長者會）地五七右左

〔略注〕①須陀洹——此四者，謂之聲聞四果。譯云：預流果，一來果，不還果，應供果。

三歸依行

毘陀和白佛：『優婆夷聞是三昧欲學者，當云何行？』佛言：『優婆夷欲學者，當持五戒，自歸於三。何等為三？自歸命佛。歸命法。歸命比丘僧。不得事餘道，不得拜於天，不得祠鬼神，不得視吉良日。』

（般舟三昧經，四輩品）玄九二六右

〔略注〕①毘陀和 Bhadrāpāla ——譯云賢護在家菩薩名。②優婆夷 Upāsika ——譯

云清信女。

師子身中蟲

大王我滅度後，未來世中，四部弟子，諸小國王，太子王子，乃是住持護三寶者，轉更滅破三寶。如師子身中蟲，自食師子，非外道也。

（仁王般若經，卷下囑累品）月九右

（二） 歸依佛

一世界一佛

一商客中，終無二導師。一國之中，亦無二王。一佛境界，無二尊號。

（增壹阿含經力品第三十八之二）是二五七右

〔略注〕①一佛境界——一佛所化之世界也。或稱一佛土。或稱一佛國土。

一語捨戒

說一語竟，名爲捨戒。云何說一語，名爲捨戒？謂言捨佛，說是一語，名爲捨戒。

（十誦律卷第四十八卷增一法之一）張六一九左

佛度人萬世

分別善惡，都有五道。人作善惡有多少，瞋恚有薄厚，天道無親，常與善人。何謂五道？一謂天道。二謂人道。三謂餓鬼道。四謂畜生道。五謂泥犁太山地獄道。

人不求度世道者，生死憂苦不斷絕，往來五道，不得解脫。賢者黠人，厭於憂苦；見師則承事，不見則思師；教誡師教人去惡就善，示人度世之道。父母養育，老病死亡，一世耳。佛度人，萬世不極；賢明智者，宜熟思惟之。

〔略注〕泥梨 *naraka* ——譯云地獄。

事佛有三輩

事佛有三輩：一輩，爲魔弟子事佛。二輩，爲天人事佛。三輩，爲佛弟子事佛。何謂魔弟子事佛？佛言：『雖受佛戒，心樂邪業；信有家親丈人，不信正真；不知有罪惡之對，假名事佛。常與邪俱，死墮無擇地獄，受苦長久；久乃出爲魔邦屬，諛諂妖嬈，難可得度。是曹輩人，宿命餘福，暫得一時見於正道；心意曹曹，難曉寤已；當復更入邪見，無窮已也。是爲魔弟子事佛。』何謂天人事佛？受持五戒，行於十善，至死不犯。信有罪福，作是得是；壽終之後，卽生天上。是爲天人事佛。

（分別善惡所起經）宿六 八二 右

何謂佛弟子事佛？奉持正戒，廣學經戒，修治上慧。知三戒苦，心不樂著。欲得解脫，行於四等六度；愍傷衆生，欲安濟之。不貪身命，知死有生，求長益福，不爲邪業。是爲佛弟子事佛。

（分別經）宿八四五左

（三） 歸依法

法供養

菩薩摩訶薩，行般若波羅蜜，於法亦等。所謂以法供養如來，種種供具供養如來，如實修行供養如來。利益安樂一切衆生，守護一切衆生善法，隨順衆生善能教化。行菩薩道，行不違言；心無疲倦，求阿耨多羅三藐三菩提。若能如是，乃得名爲供養諸佛，不以資生而爲供養。何以故？法是佛身；若供養法，卽供養佛。諸佛世尊，皆從如實修行而來，悉爲利益安樂衆生。

護其善法，隨順衆生。若不爾者，違本誓願，懈怠懶惰，不能成就菩提之心。

（勝天王般若經 卷第二念處品）月八六九右

佛爲父法爲母

惡有父母：癡爲惡父，愛爲惡母。善亦有父母：三十七品經爲善父，六波羅蜜爲善母。復有父母：佛爲父，法爲母。隨佛語，案法行，是爲父母行。

（罵意經）宿八九右

〔略注〕①三十七品經——四念處，四正勤，四如意足，五根，五力，七覺分，八正道支，總稱爲三十七道品。爲趣菩提道之行程也。

何謂佛法

甘露法者，是名佛法。安隱法者，是名佛法。無戲論法，是名佛法。無過惡法，

是名佛法。無結使法，是名佛法。出要之法，是名佛法。無怖畏法，是名佛法。無分別法，是名佛法。不執自他法，是名佛法。無譏呵法，是名佛法。作舍，作依歸，作洲渚，作守護法，是名佛法。調伏寂法，是名佛法。自淨無垢，照明之法，是名佛法。正向正趣法，是名佛法。無諸妄想善調伏法，是名佛法。善教善導隨宜之法，是名佛法。自說說他法，是名佛法。如法調伏諸外道法，是名佛法。降諸魔法，是名佛法。斷生死流法，是名佛法。正念之法，是名佛法。住念處故正斷法，是名佛法。斷諸惡故神足法，是名佛法。觀身心輕故諸根法是名佛法，信爲首故諸力法是名佛法，無能降伏故諸覺法是名佛法，次第覺故正道法是名佛法，正流入故三昧法是名佛法，究竟寂靜故智慧法是名佛法，貫穿諸聖解脫法故真諦法是名佛法，無忿恚故諸辯

法。是名佛法。法辭及義。樂說無滯故。明了無常^{十三}苦無我法。是名佛法。呵毀一切諸有爲故。空法。是名佛法。降伏一切諸外道故。寂靜法。是名佛法。趣涅槃故。波羅蜜法。是名佛法。至彼岸故。方便法。是名佛法。善攝取故。慈法^{十三}。是名佛法。無過智故。悲法。是名佛法。無逼切故。喜法。是名佛法。滅不喜故。捨法。是名佛法。所作辦故。禪法。是名佛法。滅憍慢故。不斷三寶法。是名佛法。發菩提心故。一切安樂無苦惱法。是名佛法。不求諸有故。

（大方廣寶篋經卷中）字十四^{四八}左

〔略注〕①無戲論——戲論爲虛妄無實之論理。②結使——煩惱之異名。纏縛心身。驅役心身者也。③出要——出離生死之要道。④念處——四念處。⑤正斷——四正斷。⑥神足——四神足。⑦諸根——五根。⑧諸力——五力。⑨諸覺——七覺支。

⑩正道——八正道也。以上總稱爲三十七道品。⑪諸辯法——四無礙辯，於法、辭、義、樂說之四者，無礙自在也。⑫無常苦無我——諸行無常，一切皆苦，諸法無我，謂之三法印。佛法區別於外道之標幟也。於此加涅槃寂靜，謂之四法印。⑬慈法、悲法、喜法、捨法——以上四法，合稱四無量心。捨，古譯爲護。慈悲喜護，稱爲四等。

世間難信之法

舍利弗！善男子，善女人，若有信者，應當發願生彼國土。舍利弗！如我今者稱讚諸佛不可思議功德，彼諸佛等，亦稱讚我不可思議功德，而作是言：「釋迦牟尼佛，能爲甚難希有之事；能於娑婆國土五濁惡世，劫濁、見濁、煩惱濁、衆生濁、命濁中，得阿耨多羅三藐三菩提，爲諸衆生說是一切世間難信之法。」舍利弗！當知我於五濁惡世，行此難事，得阿耨多羅三藐三

菩提，爲一切世間說此難信之法，是爲甚難。

（阿彌陀經）地十二
七三
右

〔略注〕①劫濁——惡時也。天災地變等相續起之時也。②見濁——惡見邪見競起之謂。③煩惱濁——煩惱身心之謂也。④衆生濁——衆生惡逆增盛之謂。⑤命濁——人壽漸減無長壽之謂。

（四）歸依僧

供養比丘

佛言：「若諸比丘，依佛法出家，一切天人阿修羅，皆應供養。」

（地藏十輪經）玄七

象王捨身供法服人

善男子！乃往過去，有迦闍國王，名梵授，勅旃荼羅：『有大象王，名青蓮目，六牙具足，住雪山邊，汝可往彼拔取牙來！若不得者，汝等五人，定無活義。』時旃荼羅，爲護身命，執持弓箭，被赤袈裟，詐現沙門威儀形相，往雪山邊，至象王所。時彼母象，遙見人來，執持弓箭，驚怖馳走，詣象王所，白言：『大天！今見有人，張弓捻箭，徐行視覘，來趣我等，將非我等命欲盡耶？』象王聞已，舉目便見，剃除鬚髮，著袈裟人，卽爲母象，而說頌曰：

被菟伽沙等，諸佛法幢相。觀此離諸惡，必不害衆生。

時彼母象，以頌答曰：

雖知被法服，而執持弓箭；是惡旃荼羅，樂惡無悲愍。

時大象王，復說頌曰：

見袈裟一相，知是慈悲本；此必歸佛者，愍念諸衆生。
汝勿懷疑慮！宜應速攝心！被此法衣人，欲渡生死海。
時旃荼羅，卽以毒箭，彎弓審射，中象王心。母象見之，舉聲號响，悲哀哽噎，
以頌白言：

被此法衣人，宜應定歸佛；威儀雖寂靜，而懷毒惡心。
應速踢彼身，令其命根斷；滅此怨令盡，以射天身故。

時大象王，以頌答曰：

寧速捨身命，不應生惡心；彼雖懷詐心，猶似佛弟子。
智者非爲命，而懷清淨心；爲度諸有情，常習菩提行。

時大象王，心生悲愍，徐問人曰：『汝何所須？』
彼人答曰：『欲須汝牙。』

象王歡喜，卽自拔牙，施旃荼羅，而說頌曰。

我以白牙今施汝，無忿無恨無貪惜；願此施福當成佛，

滅諸衆生煩惱病。

善男子！當觀如是過去象王，雖受無暇傍生趣身，爲求阿耨多羅三藐三菩提故，而能棄捨身命無恚，恭敬尊重著袈裟人，雖彼爲怨而不加報。

（地藏十輪經，卷第四無依行品）玄七一七左

〔略注〕①迦闍國 Kāśi —— 印度地名。②梵授 Brahmadatta —— 之意譯，本生經中

古王之名。③旃荼羅 Candīa —— 最下之賤種，業屠殺者。④菴伽 Ganga —— 恆

河。⑤法幢相 —— 袈裟爲諸佛解脫幢相，卽表示解脫之標幟也。⑥傍生 —— 卽畜

生，橫步故名傍生。無暇者，終身營營也。

(五) 信心

信能渡河

欲見諸真，樂聽講法；能捨慳垢，此之謂信。信能渡河，其福難奪。

(出曜經第十二信品) 藏五九四右

信如樓櫓

如王邊城，造立樓櫓，築地使堅，不可毀壞；為內安隱，制外怨敵。如是聖弟子，得堅固信，深著如來；信根已立，終不隨外沙門梵志，若天魔梵，及餘世間。是謂聖弟子得信樓櫓，除惡不善，脩諸善法也。

(中阿含經第一城喻經) 長五六右

信為道元功德母

信爲道元功德母，增長一切諸善法；
除滅一切諸疑惑，示現開發無上道。
淨信離垢心堅固，滅除憍慢恭敬本。
信是寶藏第一法，爲清淨手受衆行。
信心能離諸染著，信解微妙甚深法。
信能轉勝成衆善，究竟必至如來處。
清淨明利諸善根，信力堅固不可壞。
信永除滅一切惡，信能逮得無師寶。
信於法門無障礙，捨離八難得無難。
信能超出衆魔境，示現無上解脫道。
一切功德不壞種，出生無上菩提樹。
長養最勝智慧門，信能示現一切佛。
是故演說次第行，信樂最勝甚難得。
譬如靈瑞優曇華，亦如隨意妙寶珠。

（華嚴經第六賢首菩薩品）天七_三左_二

〔略注〕①八難——見佛聞法，有障難八處：一地獄。二餓鬼。三畜生。四北拘盧洲。五長壽天。六聾盲瘖瘂。七世智辯聰。八佛前佛後，無佛時處。②優曇華——Udumbara 譯云靈瑞華。三千年一現者。

信爲衆德本

信心者；一切行以信爲首，衆德根本。 (梵網戒經，卷上) 列一右三

信與戒

入佛法海，信爲根本。渡生死河，戒爲船筏。

(心地觀經，第四厭捨品) 字二六〇右

唯信一法能報佛恩

如來應等正覺，三界最勝，度脫生死，無上大師。此恩難報；唯有一法，能報

佛恩。若於佛法，深心得，不壞信，是名報恩。以此供養，亦自利益。

（正法念處經，卷第六十一觀天品）宿四二五右

信者無窮乏

信為最上乘，	以是成正覺；	是故信等事，	智者敬親近。
信為最世間，	信者無窮乏；	是以信等法，	智者正親近。
不信善男子，	不生諸白法；	猶如焦種子，	不生於根芽。

（大乘十法經）地八七二左

誠信離五惡

王言：「何等為誠信。」

那先言：「誠信解人疑。信有佛，信經法，信有比丘僧，信有羅漢道；信有今

世，信有後世；信孝父母，信作善得善，信作惡得惡；信有是以後，心便清淨，去離五惡。何等五？一者姪姝，二者瞋怒，三者嗜臥，四者歌樂，五者疑。人不去是五惡，心意不定；去是五惡，心便清淨。

那先言：譬如遮迦越王，車馬人從，厲度令水濁惡；過度以去，王渴欲得水飲；王有清水珠，置水中，水即爲清，王便得清水飲之。那先言：『人心有五惡，如濁水；佛諸弟子，度脫生死之道，人心清淨，如珠清水。人却諸惡，誠信清淨，如明月珠。』

王言：『善哉！善哉！』

（那先比丘經，卷上）藏八四六右左

〔略注〕①遮迦越王 Cakravartī-rāja——譯云轉輪王，統一一四天下之王者也。

直心是菩薩淨土

直心是菩薩淨土；菩薩成佛時，不詔衆生，來生其國。深心是菩薩淨土，菩薩成佛時，具足功德衆生，來生其國。

（維摩經第一佛國品）黃七一五右

菩薩之堅信

佛告阿難：「菩薩摩訶薩，令無量無邊阿僧祇衆生，信佛知見；信佛知見已，不著色，不著受、想、行、識。以不著色，不著受、想、行、識故，是菩薩摩訶薩，名爲堅信。」

復次：阿難！菩薩摩訶薩，信諸佛所說法，皆悉空寂；信此法者，是菩薩摩訶薩，名爲堅信。

復次：阿難！菩薩摩訶薩，信於佛智，便作是念：我等亦當成就此智，亦不見此智。是故阿難！菩薩摩訶薩，名爲堅信。

復次：阿難！菩薩摩訶薩作是念：如佛世尊，以不可思議法施諸衆生；我亦應學以不可思議法施諸衆生。如是菩薩摩訶薩，名爲堅信。

復次：阿難！菩薩摩訶薩，心生歡喜，捨一切物，乃至自身，尙以布施；何況餘物。信行此施而不倚著；於一切處，不生慳悋；以此因緣，迴向菩提，亦不起菩提見。是菩薩摩訶薩，名爲堅信。

復次：阿難！菩薩摩訶薩，信心清淨，無有怯弱；於佛法僧，心得淳淨；守護六情，無所願求，無信衆生；於佛法僧，令生信樂；已生信樂，心不放逸；發菩提心，不著心相；信知六界，與法界等。云何信知？所謂此界以諸音聲文字故說，實不可得；信知諸行是無常、苦、空、無我之法，亦信無漏聖戒非戲論法，具諸三昧，信一切衆生卽是滅界，衆生之相卽是滅相；以無依心，見諸衆

生，即是法界；而於此法，不見法界。所以者何？法界即是衆生無心之界。菩薩摩訶薩，如是信者，名爲堅信。

一切衆生，無有住處。所以者何？自性空故。亦復不見衆生形相，見諸衆生，同涅槃相。所以者何？衆生界空，是故卽見是涅槃相。若有能信如是法者，令多衆生得如是信。是故阿難！菩薩摩訶薩，名爲堅信。」

（廣博嚴淨不退轉輪經，第二）盈三四左
五右

信解佛說，倍爲希有

「舍利弗！譬如有人，以石爲棧，從海此岸，度至彼岸。於意云何？爲希有不？」
「希有！世尊！」
「舍利弗：如來所說，一切諸法，無生無滅，無相無爲，令人信解，倍爲希有。」

（佛藏經，卷上）列二左

(六) 懺悔

至心懺悔

一切業障悔，皆從妄想生。若欲懺悔者，端坐念實相；
衆罪如霜露，慧日能消除。是故應至心，懺悔六情根。

(觀普賢行法經) 盈四七三
右

懺悔惡業

我昔所造諸惡業，皆由無始貪恚痴，從身語意之所生，一切我今皆懺悔。

(華嚴經，普賢行願品第四十偈頌) 天六七六
左

於佛法中二種無犯

於我法中，有二種人，各無所犯：一者，本性專精，本來不犯。二者，犯已慚愧，

發露懺悔。此二種人，於我法中，名爲勇健得清淨者。

（地藏十論經，卷第七懺悔品）玄七^{三〇}左

（七） 供養

貧女一燈

一時，佛在羅閱祇國耆闍崛山中。時阿闍世王請佛。飯食已訖，佛還祇洹。王與祇婆議曰：『今日請佛，佛飯已竟，更復所宜？』祇婆言：『惟多然燈也。』於是王乃勅具百斛麻油膏，從宮門至祇洹精舍。時有貧窮老母，常有至心，欲供養佛，而無資財。見王作此功德，乃更感激；行乞得兩錢，以至麻油家買膏。膏主曰：『母人大貧窮，乞得兩錢，何不買食？』母曰：『我聞佛生難值，百劫一遇；我幸逢佛世，而無供養；今日見王

作大功德，巍巍無量，激起我意；雖實貧窮，故欲然一燈，爲後世根本者也。
『於是膏主，知其至意，與兩錢膏，應得二合，特益三合，凡得五合。
母則往當佛前，然之；心計此膏，不足半夕，乃自誓言：『若我後世，得道如
佛，膏當通夕，光明不消。』作禮而去。

王所然燈，或滅或盡，雖有人侍，恆不周而。老母所然一燈，光明特朗，殊勝
諸燈，通夕不滅，膏又不盡，至明朝旦。

佛告目連：『今天已曉，可滅諸燈！』目連承教，以次滅諸燈。燈皆已滅，惟
此母一燈，三滅不滅，便舉袈裟以扇之，燈光益明。佛告目連：『止！止！此當
來佛之光明功德，非汝威神之所毀滅。』

王聞之，問祇婆曰：『我作功德，巍巍如此，而佛不與我決；此母然一燈，便

受決，何以爾也？祇婆曰：『王所作雖多，心不專一，不如此母注心於佛也。』
（阿闍世王授決經）宙七右

〔略注〕①羅閱祇國 Rajagaha —— 王舍城也。 ②耆闍崛山 Gijjhakuta (p) —— 靈

鷲山也。 ③阿闍世王 Ajatasattu —— 譯云未生怨。 ④祇婆 Jivaka ⑤決 —— 將

來之果報決定不虛，佛對修行者之豫言也。

菩薩四事供養如來

時海龍王問世尊曰：『其有人，以華香雜香，搗香，繪蓋幢幡，伎樂衣被，飲食牀臥，病瘦醫藥，供養如來。寧應供養不？』佛言：『龍王！隨其所種，各得其類；此之供養，不為究竟。離於垢塵，植於德本，逮至賢聖心之解脫。不為無德，不至無上。菩薩有四事，應供養如來。何等四？不捨道心，植諸德本。心

立大哀，合集慧品。建大精進，嚴淨佛土。入深妙法，心得法忍。是爲四，尊敬如來爲供養也。」

（海龍王經，法供養第十八）字九六七
右

淨飯王供佛之因緣

於是淨飯王爲尊者優陀夷而說偈言：

我子捨家無少樂，或乏飲食或臥具；
猶如鮮潔青蓮華，置之陸地當枯悴。

尊者優陀夷以偈答曰：

如來遊戲諸神通，常冷禪悅無飢渴；
由住寂靜妙等持，若金蓮華體堅實。

時淨飯王復說偈言：

太子昔在皇宮日，百千彩女常圍繞，
睡寤常聞歌吹聲；
棲止山林有何樂？

尊者優陀夷以偈答曰：

佛住解脫勝境界，深心依止諸禪定；
行住坐臥威儀中，
常生喜樂曾無苦。

時淨飯王復說偈言：

太子昔在皇宮日，衆妙茵褥敷臥具，
百千燈炬常照明，
向夕未嘗知有暗。

尊者優陀夷以偈答曰：

牟尼廣修殊勝行，以四無量爲茵褥；
心常利樂諸有情，

於中庸境無癡鈍。

時淨飯王復說偈言：

昔時太子居深殿，

遊戲受用諸快樂，

左右侍衛善承迎；

獨止山林何所得？

尊者優陀夷以偈答曰：

如來所止悉清勝，

樂居寂靜阿蘭若，

平等觀眎於世間，

常得天龍常恭敬。

時淨飯王復說偈言：

昔日太子處王宮，

沐浴嬪嬙競承事，

上妙塗香以瑩身；

棲止山林何所得？

尊者優陀夷以偈答曰：

牟尼持戒爲浴池，永滌諸惡淨無垢，
離衆塵穢登彼岸，能令自他悉清淨。

時淨飯王復說偈言：

太子所著殊妙衣，金縷貫飾珠瓔珞，
棲止山林何所得？梅檀和合妙塗香；

尊者優陀夷以偈答曰：

牟尼以慙爲上服，菩提分法如珠鬘，
以用莊嚴功德體，護戒清涼若塗香。

時淨飯王復說偈言：

太子所住常嚴警，百千勇士持戈胄，
繖蓋迎空蔽日光；
獨向山林誰守護？

尊者優陀夷以偈答曰：

牟尼具足十智力，於諸怖畏心不動，
慈悲普蔭諸羣生，
沙門法子常圍遶。

時淨飯王復說偈言：

善哉善哉佛功德！不久當往聞法要。
願今先受我供養！
復持香飯奉如來！

（父子合集經、卷第一淨飯王始發信心品）地十十六左
消滅國家七難

復次：大德阿難，灌頂刹利王等，若災難起時：所謂人民疾疫難，他方侵逼難，自界反逆難，星宿變怪難，日月薄蝕難，非時風雨難，過時不雨難；爾時此灌頂刹利王，當於一切衆生，起慈愍心，赦諸繫閉；依前所說供養法式，供養彼世尊藥師琉璃光如來。時灌頂刹利王，用此善根，由彼世尊藥師琉璃光如來本昔勝願故；其王境界，即得安甯，風雨以時，禾稼成就，國土豐熟；一切國界所有衆生，無病安樂，多生歡喜。於其國界，亦無夜叉、羅刹、毗舍闍等諸惡鬼神，擾亂衆生；所有惡相，皆即不現。彼灌頂刹利王，壽命色力，無病自在，並得增益。

（藥師如來本願經）黃四八六左

〔略注〕①灌頂刹利王——灌頂abhiseka 即位之時，以四大海水灌頂，以表慶祝之意。

（八） 菩提心

菩提心之功德

善男子！菩提心者，猶如種子；能生一切諸佛法故。菩提心者，猶如良田；能長衆生白淨法故。菩提心者，猶如大地；能持一切諸世間故。菩提心者，猶如大水；能滌一切煩惱垢故。菩提心者，猶如大風；普行世間無所礙故。菩提心者，猶如大火；能燒一切諸見薪故。菩提心者，猶如淨日；普照一切諸世間故。菩提心者，猶如盛月；普能圓滿白淨法故。菩提心者，猶如明燈；能放種種法光明故。菩提心者，猶如淨日；普見一切夷險處故。菩提心者，猶如大道；普令得入大智城故。菩提心者，猶如正濟；令其得離諸邪法故。菩提心者，猶如大車；普能運載諸菩薩故。菩提心者，猶如門戶；開示一切菩薩行故。菩提心者，猶如宮殿；安住修習三昧法故。菩提心者，猶如園苑；於

中遊戲受法樂故。菩提心者，猶如舍宅；安隱一切諸衆生故。菩提心者，則爲所歸；利益一切諸世間故。菩提心者，則爲所依；諸菩薩行所依處故。菩提心者，猶如嚴父；訓導一切諸菩薩故。菩提心者，猶如慈母；生長菩薩諸善根故。菩提心者，猶如乳母；養育守護諸菩薩故。菩提心者，猶如善友；成益一切諸菩薩故。菩提心者，猶如君主；勝出一切二乘人故。菩提心者，猶如鐵圍山；攝持一切諸世間故。菩提心者，猶如大雪山；長養一切智慧藥故。菩提心者，猶如香山；出生一切功德香故。菩提心者，如大虛空；諸妙功德廣無邊故。菩提心者，如妙蓮華；不染一切世間法故。

（華嚴經普賢行願品第三十五）天六五八右

〔略注〕①鐵圍山 Cakra vāla ——此爲印度之世界說。以世界之中心爲高山，并有九山

八海次第加高山有九重，其各山之間有海；鐵圍山當第九位最高之山。

菩提心之功德

善男子！菩提心者，成就如是無量無邊最勝功德。舉要言之，應知悉與一切佛法諸功德等。何以故？因菩提心出生一切菩薩行輪，三世十方一切如來，從菩提心而出生故。是故善男子，若有能發阿耨多羅三藐三菩提心者，則已出生無量功德，普能攝取一切智道。

（華嚴經普賢行願品第三十五）天六五九右

菩提心之燈

善男子！譬如一燈，然百千燈；其本一燈，無滅無盡。菩薩摩訶薩菩提心燈，亦復如是。普然三世諸佛智燈，而其心燈無滅無盡。善男子！譬如一燈，入

於闇室；百千年闇，悉能破盡；發起光明，普照一切。菩薩摩訶薩菩提心燈，亦復如是：入衆生心無明闇室，能滅無量百千萬億不可說劫積聚一切諸業煩惱種種障礙，發生一切大智光明。

（華嚴經，普賢行願品第三十六）天六六一
右

〔略注〕①業、煩惱——業 Karma 者，造作。煩惱 Mīśra 者，迷惑之精神作用也。由煩惱而有身、口、意迷惑之業。

菩提心之威力

善男子！如師子王哮吼之時，師子兒聞，皆增勇健；餘獸聞之，脂血銷耗，即皆竄伏。佛師子王，菩提哮吼，一切智聲，應知亦爾。諸菩薩聞，養育法身，增長功德；其餘一切邪執衆生，聞皆退散，如冰消釋。善男子！譬如有人，以師

子筋，而爲樂絃；其音既奏，餘絃悉絕。菩薩摩訶薩，亦復如是：以如來師子波羅蜜身菩提心筋，爲法樂絃；其音既奏，一切五欲，及以二乘諸功德絃，悉皆斷滅。

善男子！譬如有人，以牛、羊等種種諸乳，假使集聚，盈於大海；以師子乳，一滴投中，直過無礙；能令衆乳，一時變壞。菩薩摩訶薩，亦復如是：以如來師子菩提心乳，著無始際業煩惱中，直過無礙，悉令壞滅，終不住於二乘解脫。

善男子！譬如雪山迦陵伽鳥，在卵殼中，有大勢力；一切諸鳥，所不能及。菩薩摩訶薩，亦復如是：於生死殼，發菩提心，所有大悲功德勢力，聲聞獨覺，無能及者。

（華嚴經普賢行願品第三十六）天六六二右

〔略注〕①迦陵頻伽 Kalairnka —— 譯云好聲鳥。②聲聞 —— śrāvaka 之意譯，聞佛

說法而悟者。③獨覺 —— 辟支佛 Pratyeka-Buddha 無師而獨自覺悟者。

發心爲難

阿逸多！當知諸佛一切功德，皆在初發調伏心中。是故菩薩世間難遇，佛亦難值。阿逸多！譬如無牛，則無醍醐；如是若無菩薩發心，則無佛種。若有牛，則有醍醐；如是若有菩薩發心，則佛種不斷。阿逸多！譬如有種，則有華實，如是若有菩薩發心，則佛種不斷。是故當知發心爲難，發心難故，佛亦難得。

（華手經發心品第十一）字五十二右

〔略注〕阿逸多 Ajita —— 譯云無能勝。彌勒菩薩之號。

作佛在初心

佛燈出於世，萬億劫難值；
如優曇鉢華，時時乃一現。
深發菩提心，正行佛道者；
如是大菩薩，世間亦難遇。
是故若有人，能發此大心；
斯人當作佛，處衆師子吼。
自在師子吼，能轉淨法輪；
佛神通無礙，皆在初心中。

菩薩心離五怖畏

爾時彌勒菩薩，復告善財童子言：「善男子！譬如有人，得無畏藥，離五恐怖。何等爲五？所謂火不能燒，毒不能中，刀不能傷，水不能漂，煙不能熏。菩薩摩訶薩，亦復如是：得一切智菩提心藥，離五怖畏。何等爲五？不爲一切三毒火燒，五欲毒不中，惑刀不傷，有流不漂，諸覺觀煙不能熏害。」

（華嚴經普賢行願品第三十六）天六五九左

〔略注〕①覺觀——新譯爲尋思。麤思爲覺，細思爲觀。②有流——有者存在，此有欲界

色界無色界三類。因在迷界，譬之曰流，度之卽爲涅槃之彼岸。

發大乘心無男女別

善男子！發大乘者，不見男女，而有別異。所以者何？薩婆若心，不在三界，有分別故，有男有女。

（首楞嚴三昧經卷上）黃七左五

道心無男女

賢者大迦葉謂：『女及諸夫人，無上正覺，甚難可獲；不可以女身得成佛道。』寶錦女謂大迦葉：『心志本淨，行菩薩者，得佛不難。彼發道心，成佛如觀手掌。適以能發諸通慧心，則便攝取一切佛法。』女謂迦葉：『又如所云：不可以女身得成佛道；男子之身，亦不可得。所以者何？其道心者，無

男無女。

（海龍王經、女寶錦受決品第十四）字九六四右

壞菩薩心則斷滅一切佛法

起五無間罪，尚不能壞一佛之法；若人毀壞菩薩心者，則為斷滅一切佛法。舍利弗！譬如殺牛，則為已壞乳酪及酥。

（華手經、毀壞品第二十六）字五四六右

〔略注〕①五無間罪——墮無間地獄之五種罪。即殺父，殺母，殺阿羅漢，破和合僧，出佛身血也。

三事驗菩薩心

佛告舍利弗：應以三事驗菩薩心。何謂為三？一者能捨一切所有，而不望報；當知是為真菩薩心。二者求法無所貪惜，甯失身命，而不捨法；是則名

爲真菩薩心。三者不逆甚深之法，以信解力，於佛菩提，不生疑惑；是亦名爲真菩薩心。以是三心，驗諸菩薩。

又舍利弗！復有三事，驗菩薩心。何謂爲三？常勤精進，求法不倦，謂是大乘菩薩藏經，以是經故，自增善根；亦能增長衆生善根。常隨法師，恭敬供養；若過千歲，乃能得聞善根相應一四句偈；聞已隨順，不違不逆，不沒不退，追隨法師，益加恭敬。恆自咎責，我以宿世障法罪故，不得聞法，非法師咎；今當親近隨從法師，令我一切障法罪業，皆悉消滅，是亦名爲真菩薩心。是故當知，菩薩摩訶薩，深心求法，隨逐法師，則能成就一切佛法。

（華手經、驗行品第二十二）字五、三八
右

爾時世尊告韋提希：汝今知不？阿彌陀佛，去此不遠；汝當繫念，諦觀彼國淨業成者。我今爲汝廣說衆譬，亦令未來世一切凡夫，欲修淨業者，得生西方極樂國土。欲生彼國者，當修三福：一者孝養父母，奉事師長，慈心不殺，修十善業。二者受持三歸，具足衆戒，不犯威儀。三者發菩提心，深信因果，讀誦大乘，勸進行者。如此三事，名爲淨業。佛告韋提希：汝今知不？此三種業，乃是過去、未來、現在三世諸佛淨業正因。

（觀無量壽佛經）地十二七八右

〔略注〕○三福——可致福德之三種行業，此分爲世福、戒福、行福之三種。○淨業——

業爲 Karma 之譯，由是以招將來之果。淨業者，卽清淨之業，最勝之業也。

（九）善知識

善知識是全梵行人

爾時阿難，白世尊言：『所謂善知識者，卽是半梵行之人也；將引善道，以至無爲。』

佛告阿難：『勿作是言！言善知識者，卽是半梵行之人！所以然者？夫善知識之人，卽是全梵行之人；與共從事，將視好道。我亦由善知識，成無上正真等正覺，以成道果，度脫衆生，不可稱計，皆悉免生老病死。以此方便，知夫善知識之人，全梵行之人也。』

（增壹阿含經，九衆生居品第四十四）是三一八
右

不值明師不知大道

譬如四輩鼠：一者，屋間鼠。二者，家中鼠。三者，野田鼠。四者，園溷鼠。屋間鼠

不能居平地。平地鼠不能居屋間。野田中鼠，不能居人家。人家鼠不能居野田。園溷中鼠不能出園溷中也，不知倉中饒穀故也。

人復有四輩：何謂四輩？一輩人，端心正意，持戒不犯，欲得阿羅漢道。二輩人，持戒精進，欲得辟支佛道。三輩人，持戒學問，明經智慧，念度一切，欲得佛道。四輩人，託名爲弟子，不能奉持明戒，不欲學問，心意猶豫，恐不得道故。

學問不值明師，安知天下有大道乎？乘船遊於洿池，泉流，安知天下有江海。佛經如江海，一切世間經書，皆因佛經而出。
（恆水經）是八右

〔略注〕①阿羅漢 *arhān* ——譯云應供。有應他人供養之資格者。②辟支佛 *Pratyeka*

-buddha ——譯云獨覺，無師獨悟之聖者。

勤求善知識

善財白言：『聖者！唯願慈悲，廣爲我說！我應云何學菩薩行？應云何修菩薩行？應云何起菩薩行？應云何觀察菩薩行？應云何增廣菩薩行？應云何成就菩薩行？應云何令普賢行，速得圓滿？』

爾時文殊師利菩薩，告善財童子言：『善哉！善哉！善男子！若有衆生，能發阿耨多羅三藐三菩提心，是事爲難。能發心已，復欲勤求行菩薩行，倍更爲難。善男子！汝今發心，求菩薩道，爲欲成就一切智智，應當勤求真善知識。善男子！求善知識，勿生疲懈！見善知識，勿生厭足！於善知識，所有教誨，當念隨順！不應違逆！於善知識，善巧方便；但應恭敬！勿見過失！』

（華嚴經、普賢行願品第四）天五
一五
右

勤求善知識

復次：善男子！汝因此故，求善知識；勿於身心，而生疲倦。見善知識，勿生厭足。請向善知識，勿憚勞苦。親近善知識，勿懷退轉。供養善知識，無令間斷。隨順善知識教誨，不應違逆。於善知識所有功德，不應疑惑。聞善知識演說出離門，應生決定。見善知識隨順煩惱行，勿生嫌怪。於善知識所生深信，不應變改。何以故？善男子！菩薩因善知識，聞一切菩薩行。因善知識，成就一切菩薩功德。因善知識，出生一切菩薩大願。因善知識，引發一切菩薩善根。因善知識，積集一切菩薩助道法。因善知識，開發一切菩薩法光明。因善知識，成就一切菩薩出離門。因善知識，修學一切菩薩清淨戒。因善知識，安住一切菩薩功德法。因善知識，清淨一切菩薩自性心。因善知

識，發明一切菩薩堅固心。

（華嚴經、普賢行願品第三十三）天六四七右

親近善知識

復次：善男子！善知識者，猶如慈母；出生一切佛種性故。善知識者，猶如嚴父；廣大利益親付囑故。善知識者，猶如乳母；守護不令作惡法故。善知識者，猶如教師；示諸菩薩所應學故。善知識者，猶如善導；能示甚深波羅蜜故。善知識者，猶如良醫；能治種種煩惱病故。善知識者，猶如雪山；增長一切種智藥故。善知識者，猶如勇將；殄除一切識恐怖故。善知識者，猶如船師；令度生死大瀑流故。善知識者，猶如商主；令到一切智寶洲故。善男子！汝今若能如是作意，正念思惟；當得親近諸善知識。

（華嚴經、普賢行願品第三十三）天六四九右

一切佛法由善知識成長

一切佛法，如是皆由善知識力，而得圓滿。以善知識，而為根本從善知識來。依善知識生。依善知識長。依善知識住。善知識為因緣。善知識能發起。

（華嚴經、普賢行願品第三十三）天六四九左

由善知識而得成就

善男子！菩薩因善知識，常能增長一切善根；譬如雪山，生長藥草。因善知識，成佛法器；譬如大海，吞納衆流。因善知識，成功德處；譬如大海，出生衆寶。因善知識，淨菩提心；譬如猛火，能鍊真金。因善知識，出諸世間；如須彌山，出於大海。因善知識，不染世法；譬如蓮華，不著塵水。因善知識，不受諸

惡；譬如大海，不宿死屍。因善知識，增長白法；譬如白月，漸次圓滿。因善知識，照明法界；譬如盛日照四天下。因善知識，增長大願；譬如父母，養育嬰兒。

（華嚴經，普賢行願品第三十三）天六四九左

善知識恩大於父母

佛言：擇其善者從之，惡者遠離之；我與善知識相隨，自致成佛。沙門道士，教人去惡爲善，開示正道，恩大於父母。

（尸迦羅越六方禮經）是十八二右左

善人至難得

有五百人，自說言我善。佛言：『汝當善當隨我後。』人言：『諾！』佛便行入火中；五百人皆止住，無敢隨者。言：『善人至難得。』

（三慧經）藏八_{三五}
右

（十）聞法

一心聽法

其有好心善意之人，聞佛明法，一心而聽。能一日可。不能一日，半日可。不能半日，一時可。不能一時，半時可。不能半時，須臾可。其福不可量，不可訾也。

（堅意經）宿八_{十二}
左

信心聽法互爲因果

聽正法者，是亦有因；謂近善友。近善友，是亦有因；所謂信心。信心者，亦有因；因有二種：一者聽法，二者思惟義。善男子！信心者，因於聽法。聽法者，因於信心。如是二法，亦因，亦果。亦因，亦果。亦果，亦果。

（大般涅槃經，第二十八師子吼品）盈六三五左

持法之人

所謂持法者，不必多誦習；若少有所聞，具足法身行，是謂持法人。以法自將養，雖多誦習義，放逸不從正；如牧數他牛，不獲沙門正。

（出曜經，第六放逸品）藏五六四右左

照他不自明

若多少有聞，自大以憍人；是如盲執燭，照彼不自明。

（法句譬喻經，第一多聞品）藏六六七左

多誦無益事

一時，佛在舍衛國祇樹給孤獨園。爾時目連弟子阿難弟子，二人共談：

我等二人，同聲經唄，誰者爲勝。」是時衆多比丘，聞此二人，各各共論。聞已，便往至世尊所，頭面禮足，在一面坐。爾時衆多比丘，白世尊言：「今有二人共論我等二人，共誦經唄，何者爲妙。」爾時世尊，告一比丘：「汝往呼此二比丘使來。」比丘對曰：「如是！世尊！」比丘從佛受教，卽往至彼二人所，語彼二人曰：「世尊喚卿！」是時二人，聞比丘語已，卽至世尊所，頭面禮足，在一面住。

爾時世尊，告二人曰：「汝等愚人，實有此語：我等共誦經唄，何者爲妙。」二人對曰：「如是！世尊！」

世尊告曰：「汝等頗聞我說此法，共競諍乎？如此之法，何異梵志。」諸比丘對曰：「不聞如來而說此法。」

世尊告曰：『我由來不與諸比丘而說此法，當諍勝負耶？然我今日所有說法，欲有降伏，有所教化。若有比丘，受法之時，當念思惟四緣之法，意與契經、阿毗曇、律，共相應不？設共相應者，當念奉行。』
爾時世尊，便說此偈：

多誦無益事，此法非爲妙；
猶算牛頭數，此非沙門要。
若多誦少習，於法而行法；
此法極爲上，可謂沙門法。
雖誦千章，不義何益？
不如一句，聞可得道。
雖誦千言，不義何益？
不如一義，聞可得道。
千千爲敵，一夫勝之。
未若自勝，以忍者上。

是故諸比丘！自今以後，勿復諍訟，有勝負心。所以然者，當念降伏一切人。

民。若復比丘，有勝負心，共諍訟心，而共競者，卽以法律治彼。比丘！以是之故，當自修行。

是故二比丘，聞佛說此已，卽從坐起，禮世尊足，而求悔過。『自今以後，更不復爲；唯願世尊，受其悔過。』世尊告曰：『大法之中，快得改過；自知有諍競之心，聽汝悔過。諸比丘！更莫復爾。如是諸比丘，當作是學。』

（增壹阿含經增上品第三十一）是二一六
右左

〔略注〕①契經——修多羅 *sūtra* 之意譯。②阿毗曇——*abhidharma* 之音譯，譯云無比法。又名論。

少學之過

不知三世事，亦寡法財寶；飽腹資欲心，人形畜無別。

少學或心高，易滿如牛迹；如鼠手持物，自謂已能多，智海廣難量。不測及增謗。牛飲水成乳，蛇飲水成毒；智學成菩提，愚學爲生死。如是不了知，斯由少學過。

（華嚴經、普賢行願品第十二）天五四六左

能說能聽之十六事

凡有所說，具十六事。一者時說，二至心說，三次第說，四和合說，五隨義說，六喜樂說，七隨意說，八不輕衆說，九不呵衆說，十如法說，十一自他利說，十二不散亂說，十三合義說，十四真正說，十五說已不生憍慢，十六說已不求世報。

如是之人，能從他聽。從他聽時，具十六事。一者時聽，二者樂聽，三者至心聽，四者恭敬聽，五者不求過聽，六者不爲論議聽，七者不爲勝聽，八者聽

時不輕說者，九者聽時不輕於法，十者聽時終不自輕，十一聽時遠離五蓋，十二聽時爲受持讀，十三聽時爲除五欲，十四聽時爲具信心，十五聽時爲調衆生，十六聽時爲斷聞根。善男子！具八智者，能說能聽。如是之人，能自他利；不具足者，則不得名爲自他利。

（優婆塞戒經，卷第二）列二二七左

解脫法由聞入

我今白世尊，佛出娑婆界；此方真教體，清淨在音聞；欲取三摩提，實以聞中入，離苦得解脫。

（首楞嚴經，卷第六）成一三二左

〔略注〕①三摩提 samādhi —— 譯云等持，定之極地也。

聞說不受如盲者燈

譬如有人，於盲者前，多設燈燭，而盲不用。如失心者，裸露而行，終無慚恥；雖施衣服，彼無受心。

如是摩耶婆，彼諸疑惑愚癡衆生，聞說不受，亦復如是。

（大法炬陀羅尼經，卷第十三供養法師品）宙九五〇右

〔略注〕①摩耶婆 *Māyava* —— 譯云儒童，年少之行道者。

以緣心聽法此法亦緣

佛告阿難：汝等尚以緣心聽法；此法亦緣，非得法性。如人以手指月示人，彼人因指，當應看月；若復觀指，以爲月體；此人豈唯亡失月輪，亦亡其指。何以故？以所標指，爲明月故；豈唯亡指，亦復不識明之與暗。何以故？即以指體爲月明性；明暗二性，無所了故。（首楞嚴經，卷第二）成一五左

(十一) 法味

法喜禪悅食

三世如來出於世，爲諸衆生說四食：段、觸、思、識爲其四，皆是有漏世間食。唯有法喜禪悅食，乃是聖賢所食者。

(心地觀經第五無垢性品) 字二六六左

四種人間食五種出人間食

是時諸聖衆，著衣持鉢，入村乞食。爾時諸比丘，竟不得食，卽還出村。爾時彼佛告諸比丘，說如此妙法：「夫觀食有九事；四種人間食。五種出人間食。」

云何四種是人間食？一者搏食，二者更樂食，三者念食，四者識食，是謂世

間有四種食。彼云何名為五種之食，出世間之表？一者禪^五食，二者願食，三者念食，四者八解脫食，五者喜食，是謂名為五種之食。

如是比丘！五種之食，出世間之表；當共專念，捨除四種之食；求於方便，辦五種食。如是比丘！當作是學。」爾時諸比丘，受彼佛教已，即自剋已成辦五種之食。

（增壹阿含經，第四十一）是^{廿一}右

【略注】①搏食——新譯云段食。普通有形體之食也。②更樂食——新譯云觸食。觸於喜樂之事，而不感飢也。③念食——新譯云思食。思念所欲者，而忘飢也。④識食——由心識而支身命者也。⑤禪食——以禪味為食，以飽滿身心者也。願食，念食等，亦可推知。

大乘經典為甘露亦名毒藥

或有服甘露，傷命而早夭。或復服甘露，壽命得長存。或有服毒生，有緣服毒死。無礙智甘露，所謂大乘典。如是大乘典，亦名雜毒藥。如酥醍醐等，及以諸石蜜；服消則爲藥，不消則爲毒。方等亦如是：智者爲甘露，愚不知佛性，服之則成毒。

（大般涅槃經，第八如來性品）盈五三九右

大士之念

賢者阿那律，在彼禪空澤中，坐思惟言：『道法少欲，多欲非道。道法知足，無厭非道。道法隱處，樂衆非道。道法精進，懈怠非道。道法制心，放蕩非道。道法定意，多念非道。道法智慧，愚闇非道。』

佛以聖心，逆知其意；譬如力士，屈申臂頃，飛到其前，讚言：『善哉！善哉！阿那律！汝所念者，爲大士念。』

（阿那律八念經）是八二二右

第二章 行道

(一) 發願

善發大願是名智者

善男子！若能善發無上大願，是名智者。

(優婆塞戒經，卷第二) 列二二五右

菩薩之病

菩薩為衆生，故入生死；有生死，則有病。若衆生得離病者，則菩薩無復病。譬如長者唯有一子；其子得病，父母亦病；若子病愈，父母亦愈。菩薩疾者，以大悲起。

(維摩經，第五問疾品) 黃七二〇右

身命與道

我不受身命，但惜無上道。

（妙法蓮華經，第四勸持品）盈一三四右

願共成佛道

願以此功德，普及於一切，我等與衆生，皆共成佛道。

（妙法蓮華經，第三授記品）盈一二五右

以三不堅買三堅法

諸有智者，應以三種不堅之法，貿易三堅法。云何爲三：一者，應以不堅之財，貿易堅財。二者，應以不堅之身，貿易堅身。三者，應以不堅之命，貿易堅命。

云何應以不堅之財，貿易堅財？謂有淨信諸善男子，或善女人，如法精勤，勞役手足，竭力流汗，所獲珍財，應自供身，奉上父母，賑給妻子，奴婢、僕使，

朋友，眷屬，晝夜集會，歡娛受樂。而遇沙門，或婆羅門，具淨尸羅，成調善法，勤修梵行，除去憍逸，忍辱柔和，履正直路，棄諸邪道，趣涅槃城，以淨信心，歡喜恭敬；如應如時，持用布施，遠求無上安樂涅槃，或希當來人天樂果。是名應以不堅之財，貿易堅財。

云何應以不堅之身，貿易堅身？謂有淨信諸善男子，或善女人，成就正見，能離殺生，究竟圓滿，無犯清淨。離不與取，究竟圓滿，無犯清淨。離欲邪行，究竟圓滿，無犯清淨。離虛誑語，究竟圓滿，無犯清淨。離飲諸酒，生放逸處，究竟圓滿，無犯清淨。如是等類，是名應以不堅之身，貿易堅身。

云何應以不堅之命，貿易堅命？謂我法中，諸聖弟子，如實了知，是謂苦諦；如實了知，是苦諦集；如實了知，是苦滅諦；如實了知，是能趣向苦滅道諦。

是名應以不堅之命，貿易堅命。

（本事經卷第七）辰六四九右

菩薩四願

一切菩薩，復有四願，成熟有情，住持三寶，經大劫海，終不退轉。云何爲四？一者，誓度一切衆生。二者，誓斷一切煩惱。三者，誓學一切法門。四者，誓證一切佛果。善男子！如是四法，大小菩薩，皆應修學。三世菩薩，所學處故。

（心地觀經第七功德莊嚴品）字一七五左

勝鬘夫人十願

爾時勝鬘聞授記已，恭敬而立，受十大受：

世尊！我從今日，乃至菩提，於所受戒，不起犯心。
世尊！我從今日，乃至菩提，於諸尊長，不起慢心。

世尊！我從今日，乃至菩提；於諸衆生，不起恚心。

世尊！我從今日，乃至菩提；於他身色，及外衆具，不起嫉心。

世尊！我從今日，乃至菩提；於內外法，不起慳心。

世尊！我從今日，乃至菩提；不自爲已受畜財物，凡有所受，悉爲成熟貧苦衆生。

世尊！我從今日，乃至菩提；不自爲已，行四攝法；爲一切衆生故，以不愛染心，無厭足心，無罣礙心，攝受衆生。

世尊！我從今日，乃至菩提；若見孤獨，幽繫疾病，種種厄難，困苦衆生，終不暫捨；必欲安隱，以義饒益，令脫衆苦，然後乃捨。

世尊！我從今日，乃至菩提；若見捕養衆惡律儀，及諸犯戒，終不棄捨；我得

力時，於彼處見此衆生，應折伏者，而折伏之，應攝受者而攝受之。何以故？以折伏攝受故，令法久住。法久住者，天人充滿，惡道減少；能於如來所轉法輪，而得隨轉；見是利故，救攝不捨。世尊！我從今日，乃至菩提，攝受正法，終不忘失。

（勝鬘經，如來真實義功德章第一）地一二五四右

【略注】①四攝法——布施、愛語、利益、同事。②幽繫——繫於獄中之囚人。③捕養——

捕者，捕魚鳥。養者，飼養魚鳥。皆以殺生爲業者也。④衆惡律儀——惡律儀者，紊社會風教之行跡也。

⑤十大受——十大願也。以菩薩三聚戒配之：從第一至第五，爲防非止惡願，攝律儀戒也。第六至第九，專爲利他，攝衆生戒也。第十則攝善法戒也。

（二）求道

至心求道何願不得

譬如大海，一人升量，經歷劫數，尙可窮底，得其妙寶。人有至心，精進求道不止，會當尅果，何願不得。

（無量壽經，卷上）地八一九右

一世勤苦須臾間耳

宜自決斷，端身正行，益作諸善，修已潔體，洗除心垢，言行忠信，表裏相應。人能自度，轉相拯濟，精明求願，積累善本。雖一世勤苦，須臾之間。後生無量壽佛國，快樂無窮，長與道德合明，永拔生死根本，無復貪恚愚痴苦惱之患。欲壽一劫百劫千億萬劫，自在隨意，皆可得之。無爲自然，次於泥洹之道。汝等宜各精進，求心所願。

（無量壽經，卷下）地八二四左

一 薩陀波崙菩薩求法

佛告須菩提：「若菩薩欲求般若波羅蜜，當如薩陀波崙菩薩，今在雷音威王佛所，行菩薩道。」須菩提白佛言：「世尊！薩陀波崙菩薩云何求般若波羅蜜？」

佛告須菩提：「薩陀波崙菩薩，本求般若波羅蜜時，不依世事，不惜身命，不貪利養。於空林中，聞空中聲言：『善男子！汝從是東行，當得聞般若波羅蜜。行時莫念疲倦！莫念睡眠！莫念飲食！莫念晝夜！莫念寒熱！如是諸事，莫念莫觀！亦莫思惟！離詔曲心，莫自高身，卑下他人；當離一切衆生之相！當離一切利養名譽！當離五蓋：當離慳嫉！亦莫分別內法外法！行時莫得左右顧視！莫念前！莫念後！莫念上！莫念下！莫念四維！莫動色、受、想、行、識！何以故？若動色、受、想、行、識，則不行佛法，行於生死。如是之人，不能得般若波

羅蜜。」

薩陀波崙報空中聲言：「當如教行。何以故？我爲一切衆生，作光明故；集諸佛法。」空中聲言：「善哉！善哉！善男子；汝應信解空、無相、無作法！應離諸相！離於有見！離衆生見、人見、我見、求般若波羅蜜。善男子！應離惡知識，親近善知識。善知識者，能說空、無相、無作、無生、無滅法。善男子！汝能如是，不久得聞般若波羅蜜，若從經卷聞，若從法師聞。

善男子！汝所從聞般若波羅蜜，當於是人，生大師想，當知報恩。應作是念：我所從聞般若波羅蜜，則是我善知識。我得聞般若波羅蜜，當不退於阿耨多羅三藐三菩提；不離諸佛，不生無佛世界；得離諸難，思惟如是功德利故，於法師所，生大師想。善男子！莫以世俗財利心故，隨逐法師；當以愛

重恭敬法故，隨逐法師。

又善男子！應覺魔事。惡魔或時爲說法者，作諸因緣，令受好妙色、聲、香味、觸；說法者以方便力故，受是五欲。汝於此中，莫生不淨之心，應作念言：我不知方便之力，法師或爲利益衆生，令種善根故，受用是法；諸菩薩者，無所障礙。

善男子！汝於爾時，應觀諸法實相。何等是諸法實相？佛說一切法無垢。何以故？一切法性空，一切法無我，無衆生，一切法如幻、如夢、如響、如影、如炎。善男子！汝若如是觀諸法實相，隨逐法師，不久當善知般若波羅蜜。

（般若波羅蜜經（小品）薩陀波崙品第二十七）月六_{八二}左

【略注】①薩陀波崙 Sadapralapa —— 譯云常啼。②五蓋 —— 蓋者，覆也。覆心使善不

生有五法：（一）食欲。（二）瞋恚。（三）睡眠。（四）掉悔。（五）疑。

（三）行道

道無形要當守志行

道無形，知之無益，要當守志行。譬如磨鏡，垢去明存，即自見形。斷欲守空，即見道真。

（四十二章經）藏五左

得道在意其實在行

佛言：弟子去離吾數千里，意念吾戒，必得道。在吾左側，意在邪，終不得道。其實在行，近而不行，何益萬分耶？

（四十二章經）藏五左

說道易行道難

一切世間人，作罪事易，爲福事難。一切學士，作福事易，爲道事難。爲道復

易，解道者難。說道者易，行之者難。

（五苦章句經）宿八五〇右

擇善而行之

佛告彌勒菩薩：諸天人等，我今語汝！世間之事，人用是故，坐不得道。當熟思計，遠離衆惡，擇其善者，勤而行之。愛欲榮華，不可常保，皆當別離，無可樂者。曼佛在世，當勤精進。

（無量壽經，卷下）地八二四左

淨行得安樂

一切諸衆生，皆依飲食存；一切有大力，其心無嫉妬；一切因飲食，而得多病苦；一切修淨行，而得受安樂。

（大般涅槃經，第十大衆所問經）盈五五四右

徒以聞思不能證悟

若從聞思，得自證悟，無有是處。善男子！我於此義，應說譬喻。汝當諦聽！如大沙磧中無泉井，春夏熱時，有人從西向東而行，遇有丈夫從東而來，卽問之言：『我今熱渴，何處有水、清涼樹蔭？』我欲於中飲浴休憩，除其熱渴。』彼大丈夫善知善說，而告之言：『從此東行，有其二路：一左，一右；宜從右路，勤力而行，決定當得至甘泉所，及庇清蔭。』

善男子！於意云何？』彼熱渴者，雖聞如是泉及樹名，思惟往趣，能除熱渴，獲清涼不？』答言：『不也。何以故？要依示道，至彼泉池，沐浴飲用，方除熱渴，乃得清涼。』善男子！菩薩亦爾：不但唯以聞思慧解，而能證入一切法門。』善男子！言砂磧者，卽謂生死。西來人者，謂諸衆生。熱謂衆惑。渴卽貪愛。東來知道大丈夫者，卽佛菩薩，住一切智，得法真性平等實義是也。

得清淨水無熱渴者，即自證悟真實是也。

（華嚴經，普賢行願品第三十二）天六四三左

提婆之教與佛陀之教

調達教人作福，不教人行道。佛教人作福，持戒守意，得道乃止。

（處處經）宿六九六右

【略注】○調達——Devadatta之古譯，通常云提婆達多。

戒定智三心

已有戒心，則定心成；定心已成，則智心明。如染淨氈，受色明好。有此三心，則道易得。

（般泥洹經，卷上）長十四〇右

不為道其苦彌長

夫人爲道，一世苦耳；不爲道者，其苦彌長。如人沐浴，但可外淨，心垢不除。

（佛開解梵志阿闍經）頁十八
左

佛法背俗

佛之明法，與俗相背；俗之所珍，道之所賤。清濁異流，明愚異趣。忠佞相讎，邪常嫉正；故嗜欲之人，不好我無慾之行也。

（羅云忍辱經）宿七七
右

得清淨行之四事

佛言：賴吒和羅！菩薩有四事法得清淨行。何等爲四？一者，行平等心，而無諛諂。二者，等心於一切。三者，解了空行。四者，如口所言，身行亦爾。是爲四事法。菩薩疾得清淨行。

（德光太子經）宙六
二四
右

【略注】賴吒和羅——Rastrapala 譯云護國，長者子佛弟子也。

(四) 八正道

中道之行

世間有二事墮邊行。行道弟子捨家者，終身不當與從事。何等二？一爲念在貪欲，無清淨志。二爲猗者身愛，不能精進。是故退邊行，不得值佛道德真人。若此比丘不念貪欲，著身愛行，可得受中。如來最正覺，得眼得慧，從兩邊度，自致泥洹。何謂受中？謂受八直之道：一曰正見。二曰正思。三曰正言。四曰正行。五曰正命。六曰正治。七曰正志。八曰正定。

(轉法輪經) 辰六_{一六}右

八正道

何謂道諦？謂八直道。正見、正思、正言、正行、正治、正命、正志、正定。

何謂正見？正見有二：有俗有道。知有仁義，知有父母，知有沙門梵志，知有得道真人，知有今世後世，知有善惡罪福；從此到彼，以行爲正，是爲世間正見。已解四諦苦習盡道，已得慧見空淨非身，是爲道正見。

正思亦有二：思學問，思和敬，思誠慎，思無害，是爲世間正思。思出處，思忍默，思滅愛盡著，是爲道正思。

正言亦有二：不兩舌，不惡罵，不妄言，不綺語，是爲世間正言。離口四過，講誦道語，心不造爲，盡無復餘，是爲道正言。

正行亦有二：身行善，口言善，心念善，是爲世間正行。身口精進，心念空淨，消蕩滅著，是爲道正行。

正治亦有二：不殺盜淫，不自貢高，修德自守，是爲世間正治。離身三惡，斷除苦習，滅愛求度，是爲道正治。

正命亦有二：求財以道，不貪苟得，不詐給心於人，是爲世間正命。已離邪業，捨世間占候，不犯道禁，是爲道正命。

正志亦有二：不嫉妬，不恚怒，不事邪，是爲世間正念。離心三惡，行四意端，清淨無爲，是爲道正志。

正定亦有二：性體淳調，守善安固，心不邪曲，是爲世間正定。得四意志，惟空、無想、不願，見泥洹原，是爲道正定。是爲道諦。

（阿那律八念經）長八二三右

八正道是正法律聚

阿難！何等為正法律乘、天乘、婆羅門乘、大乘，能調伏煩惱軍者？^一謂入正道，正見乃至正定。阿難！是名正法律乘、天乘、梵乘、大乘，能調伏煩惱軍者。爾時世尊即說偈言：

信戒為法軌，慚愧為長縻，正念善護持，以為善御者。
捨三昧為轅，智慧精進輪，無著忍辱鎧，安隱如法行。
直進不退還，永之無憂處，智士乘戰車，摧伏無智怨。

（雜阿含經，卷第二十八）辰三六四右

（五） 六波羅蜜

六波羅蜜之於菩薩

善男子！菩薩摩訶薩，以般若波羅蜜為母，方便善巧為父，檀那波羅蜜為

乳母，尸羅波羅蜜爲養母，忍辱波羅蜜爲莊嚴具，精進波羅蜜爲養育者，禪那波羅蜜爲澣濯人。（華嚴經，普賢行願品第三十八）天六六七右

【略注】①般若波羅蜜——Prajñāpāramitā 譯云智度。②檀那 Dhyāna——施。

③方便 Upaya——得般若智，而能實際活用者。④尸羅 Sila——戒。⑤忍辱——

—Kṣānti 之意譯。⑥精進——Virya 之意譯。⑦禪那 Dhyāna——定。以上謂之

六波羅蜜（方便在外）

諸佛由六波羅蜜而得菩提

阿難！若有菩薩摩訶薩，學是六波羅蜜皆得阿耨多羅三藐三菩提。以是故，我以六波羅蜜，倍復囑累汝。阿難！是六波羅蜜，是諸佛無盡法藏。阿難！十方諸佛現在說法，皆從六波羅蜜法藏中出。過去諸佛，亦從六波羅蜜

中，學得阿耨多羅三藐三菩提。未來諸佛，亦從六波羅蜜中，學得阿耨多羅三藐三菩提。過去、未來、現在諸佛弟子，皆從六波羅蜜中，學得滅度，已得今得當滅度。

（摩訶般若波羅蜜經（小品）累教品第六十六）月四三五
右

波羅蜜義

善男子！云何名爲波羅蜜義？行勝進滿足，是波羅蜜義。成就第一智，是波羅蜜義。不在有爲，不處無爲，是波羅蜜義。生死大患，善能覺知，是波羅蜜義。本所未覺，今悉了知，是波羅蜜義。無盡法藏，廣能示現，是波羅蜜義。解一切衆生界，是波羅蜜義。滿足無生法忍，是波羅蜜義。成不退轉，是波羅蜜義。修淨佛國，是波羅蜜義。成就衆生，是波羅蜜義。處於道場，覺一切智，

是波羅蜜義。降伏衆魔，是波羅蜜義。成就諸佛^二一切種智，是波羅蜜義。破諸異見，是波羅蜜義。^三十力、四無所畏、十八不共法，成就滿足，是波羅蜜義。成就^四十二行法輪，是波羅蜜義。如是善男子！波羅蜜義甚深無量，我但爲汝略說之耳。

（莊嚴菩提心經）黃十二右

〔略注〕①有爲無爲——爲者，造作之義。造作而變遷者，謂之有爲。否則謂之無爲。②一切種智——佛智也。③十力、四無所畏、十八不共法——唯佛成就此特殊之能力及功德。其他菩薩二乘無之，故云不共。④十二行法輪——三轉法輪，說四諦法。初示，次勸，次證。卽示轉，勸轉，證轉之謂。三轉四諦之法，乘爲十二轉法輪，卽說法也。

捨諸相處是六波羅蜜

梵天！我於往昔，供養諸佛，恭敬尊重讚歎，淨修梵行，一切布施，一切持戒，

及行頭陀^一，離於瞋恚，忍辱慈心，如所說行，勤修精進，一切所聞，皆能受持，獨處遠離，入諸禪定，隨所聞慧，讚頌思問。是諸如來，亦不見授記^二。何以故？依止所行故^三。以是當知：若諸菩薩，出過一切諸行，則得授記。

所以者何？若菩薩能捨諸相，名爲檀波羅蜜^五。能滅諸所受持，名爲尸羅波羅蜜^六。不爲六塵所傷，名爲羼提波羅蜜^七。離諸所行，名爲毘梨耶波羅蜜^九。不憶念一切法，名爲禪波羅蜜^十。能忍諸法無生性，名爲般若波羅蜜^{十二}。

（思益梵天所問經，問談品第六）字一 右二

【略注】①頭陀 Dhūta —— 不著於衣食住，而苦練修行者。 ②授記 —— 授以當來成佛

之豫言。 ③依止所行 —— 於所行所得，其意不離之謂。 ④出過諸行 —— 心住於無

所得之行也。 ⑤檀波羅蜜 Dana-paramitā —— 布施度。 ⑥尸羅 Sila 戒。 ⑦六

塵——色、聲、香、味、觸、法。 ⑧ 羸提 Kṣānti —— 忍辱。 ⑨ 毗梨耶 Virya —— 精進。
⑩ 禪 Dhyāna —— 定。 ⑪ 無性生 —— 不生不滅之本性。 ⑫ 般若 Prajñā —— 智慧。

念念六波羅蜜

菩薩住首楞嚴三昧……念念常有六波羅蜜。何以故？如是菩薩，身皆是法，行皆是法。是菩薩以一切波羅蜜熏身心故；於念念中，常生六波羅蜜。是菩薩一切悉捨，心無貪著，是檀波羅蜜。心善寂滅，畢竟無惡，是尸羅波羅蜜。心盡相，於諸塵中，而無所損，是羸提波羅蜜。勤觀擇心，知心離相，是毘梨耶波羅蜜。畢竟善寂，調伏其心，是禪波羅蜜。觀心知心，通達心相，是般若波羅蜜。

（首楞嚴三昧經，卷上）黃七右四

【略注】⑩首楞嚴三昧 Sūrangama-asmādhī —— 譯云健行定。以堅固故，諸魔不能破，

爲定中最勝者。○熏——熏習也。所行或所思，影響於身心，而於心中，存其餘習也。

(六) 般若

般若佛之母

如來則從智慧度無極生。設人觀察推其本末，過去、當來、現在諸佛，誰爲母者？則當了之：智慧度無極，是其母也。

（佛昇忉利天爲母說法經，卷中）宙六三八右

行般若波羅蜜時惡魔愁恐

「若菩薩行無所得般若波羅蜜時，惡魔愁毒，如箭入心。譬如人新喪父母。如是須菩提！惡魔見菩薩行無所得般若波羅蜜時，便大愁毒，如箭入心。」

須菩提白佛言：「世尊！但一魔愁毒？三千大千世界中魔，亦復愁毒？」佛告須菩提：「三千大千世界中諸惡魔，皆愁毒如箭入心，各於其座，不能自安。」

須菩提！菩薩摩訶薩，能如是行般若波羅蜜，是時一切世間天及人，阿修羅，不能得其便，令其憂惱。

須菩提！以是故，菩薩摩訶薩，欲得阿耨多羅三藐三菩提，當行是般若波羅蜜。」

（摩訶般若波羅蜜經（小品）第二十無盡品）月四三六右

般若波羅蜜中具足六波羅蜜

「菩薩摩訶薩，行般若波羅蜜時，具足修檀那波羅蜜，尸羅波羅蜜，羼提波羅蜜，毘梨耶波羅蜜，禪那波羅蜜，般若波羅蜜。須菩提！菩薩摩訶薩，行

般若波羅蜜時，具足諸波羅蜜。』須菩提白佛言：『世尊！菩薩摩訶薩，行般若波羅蜜時；云何具足檀那波羅蜜，尸羅波羅蜜，羼提波羅蜜，毘梨耶波羅蜜，禪那波羅蜜，般若波羅蜜？』佛告須菩提：『菩薩摩訶薩，所有布施，皆迴向薩婆若；如是須菩提！菩薩摩訶薩，行般若波羅蜜時，具足檀那波羅蜜。須菩提！菩薩摩訶薩，所有持戒，皆迴向薩婆若，是爲具足尸羅波羅蜜。菩薩摩訶薩，所有忍辱，皆迴向薩婆若，是爲具足羼提波羅蜜。菩薩摩訶薩，所有精進，皆迴向薩婆若，是爲具足毘梨耶波羅蜜。菩薩摩訶薩，所有禪定，皆迴向薩婆若，是爲具足禪那波羅蜜。菩薩摩訶薩，所有智慧，皆迴向薩婆若，是爲具足般若波羅蜜。如是須菩提！菩薩摩訶薩，行般若波羅蜜，具足六波羅蜜。』

（摩訶般若波羅蜜經（小品）第二十無盡品第二十）月四三六左

【略注】①薩婆若 Sarvajñā — 譯云一切智，佛智也。

行般若波羅蜜時一念具足六波羅蜜

須菩提白佛言：「世尊！云何菩薩摩訶薩，行般若波羅蜜時，一念中具足六波羅蜜。」佛告須菩提：「菩薩摩訶薩所有布施，不遠離般若波羅蜜，所修持戒，忍辱，精進，禪定，不遠離般若波羅蜜。」

須菩提白佛言：「世尊！云何菩薩摩訶薩，不遠離般若波羅蜜，一念中具足行六波羅蜜？」佛言：「菩薩行般若波羅蜜時，所有布施，不遠離般若波羅蜜，以不二相持戒時，亦不二相；修忍辱，勤精進，入禪定，亦不二相。」須菩提白佛言：「世尊！云何菩薩摩訶薩，布施時不二相？」須菩提！

薩摩訶薩，行般若波羅蜜時，欲具足檀那波羅蜜；檀那波羅蜜中，攝諸波羅蜜。」

佛告須菩提：「若菩薩摩訶薩，行般若波羅蜜時，住無漏心布施；於無漏心中，不見相，所謂誰施，誰受，所施何物。以是無相心，無漏心，斷愛斷慳貪心，而行布施；是時不見布施，乃至不見阿耨多羅三藐三菩提法。是菩薩，以無相心，無漏心持戒；不見是戒，乃至不見一切佛法。以無相心，無漏心忍辱；不見是忍辱，乃至不見一切佛法。以無相心，無漏心精進；不見是精進，乃至不見一切佛法。以無相心，無漏心入禪定，不見是禪定，乃至不見一切佛法。以無相心，無漏心修智慧；不見是智慧，乃至不見一切佛法。」

（摩訶般若波羅蜜經（大品）一念品第七十六）月四五四右

(七) 布施

布施有三種

佛告觀自在菩薩曰：善男子！各有三種施。三種者：一者法施。二者財施。三者無畏施。

（解深蜜經，地波羅蜜多品）黃八六〇左

【略注】○無畏施——菩薩無害他心，令使一切衆生無畏也。

慈心平等行施

凡行施時，不見受者持戒，破戒，是田，非田，此是知識，施時不見器，非器，不擇日時是處，非處，亦復不計飢饉豐樂，不見因果，此是衆生，此非衆生，是福，非福。雖復不見施者，受者，及以財物，乃至不見斷及果報，而常行施，無有斷絕。

善男子！菩薩若見持戒、破戒，乃至果報，終不能施；若不布施，則不具足檀波羅蜜；若不具足檀波羅蜜，則不能成阿耨多羅三藐三菩提。

善男子！譬如有人，身被毒箭；其人眷屬，欲令安隱，爲除毒故，卽令良醫，而爲拔箭；彼人方言：且待！莫觸我！今當觀如是毒箭，從何方來？誰之所射？爲是利利、婆羅門、毗舍、首陀？復更作念：是何木耶？竹耶？柳耶？其鏃鐵者，何冶所出？剛耶？柔耶？其毛羽者，是何鳥翼？烏、鴉、鷲耶？所有毒者，爲從作生？自然而有？爲是人毒？惡蛇毒耶？如是痴人，竟未能知，尋便命終。

善男子！菩薩亦爾：若行施時，分別受者持戒、破戒，乃至果報，終不能施；若不能施，則不具足檀波羅蜜；若不具足檀波羅蜜，則不能成阿耨多羅三藐三菩提。

善男子！菩薩摩訶薩，行布施時，於諸衆生，慈心平等，猶如子想。又行施時，於諸衆生，起悲愍心；譬如父母，瞻視病子。行施之時，其心歡喜；猶如父母，見子病愈。既施之後，其心放捨，猶如父母，見子長大，能自在活。

（大般涅槃經，第十五梵行品）盈五七六右

【略注】○是田非田——田者福田。將來收福德之田地，喻聖賢也。

食施與法施

有二施：飲食美味，以安身命。敷散經典，開微悅聽。食施安身，法施遷神。二事雖快，法施爲最。

（進學經）宿八五左

法施與財施

善男子！假使有人，以三千大千世界，滿中七寶，供養如來。若復有人，勸請

如來，轉大法輪；所得功德，其福勝彼。何以故？彼是財施，此是法施。善男子！且置三千大千世界七寶布施；若人以滿洹河沙數大千世界七寶，供養一切諸佛；勸請功德，亦勝於彼。由其法施，有五勝利。云何爲五？一者，法施兼利自他，財施不爾。二者，法施能令衆生出於三界，財施之福，不出欲界。三者，法施能淨法身，財施但唯增長於色。四者，法施無窮，財施有盡。五者，法施能斷無明，財施唯伏貪愛。是故善男子！勸請功德，無量無邊，難可譬喻。

（金光明最勝王經，卷第三滅業障品）黃九
右二

三施具足乃疾得佛

菩薩勤苦，具足三施。何謂三施？外施，內施，大施，是爲三施。衣食珍寶，國土妻子，是爲外施。肢體骨肉，頭目髓腦，是爲內施。四等六度，四諦非常，十二

部經，爲衆生說，是爲大施。求道三法，三施具足，乃疾得佛。

（生經，卷第五佛說譬喻經）宿五
五四
左

【略注】①四等——慈悲喜捨之四無量心也。②六度——布施、持戒、忍辱、精進、禪定、智慧之六波羅蜜也。③四諦——苦、集、滅、道。苦、集爲迷界之果與因，滅、道爲悟界之果與因。④十二部經——（一）修多羅 Sūtra（契經）（二）祇夜 Geyā（應頌）（三）伽陀 Gāthā（諷誦）（四）尼陀那 Nidāna（因緣）（五）伊帝多目 Itivṛtaka（本事）（六）闍多伽 Jātaka（本生）（七）阿浮達摩 Abhūta-dharma（未曾有）（八）阿波陀那 Avāṭāna（譬喻）（九）優婆提舍 Upadeśa（論議）（十）優陀那 Udāna（無問自說）（十一）毗浮略 Vaipulya（方廣）（十二）和伽羅 Vyākaraṇa（授記）

財施獲八功德

以財物惠施，獲八功德。云何爲八？一者，隨時惠施，非爲非時。二者，鮮潔惠施，非爲穢濁。三者，手自斟酌，不使他人。四者，誓願惠施，無憍慢心。五者，解脫惠施，不望其報。六者，惠施求滅，不求生天。七者，施求良田，不施荒地。八者，然持此功德，惠施衆生，不自爲己。

（增壹阿含經，卷第三十七）頁三左七

施有五種

善男子！有智之人，施有五種：一者至心施。二者自手施。三者信心施。四者時節施。五者如法求物施。

（優婆塞戒經，卷第四）列二三七右

智人行施

智人行施，不爲報恩，不爲求事，不爲護惜慳貪之人，不爲生天人中受樂，不爲善名流布於外，不爲畏怖三惡道苦，不爲他求，不爲失財，不以多有，不爲不用，不爲家法，不爲親近。

智人行施，爲憐愍故，爲欲令他得安樂故，爲令他人施心故，爲諸聖人本行道故，爲欲破壞諸煩惱故，爲入涅槃斷於有故。

（優婆塞戒經，卷第五）列二四〇
右

假名施與義施

若先不能供養父母，惱其妻子奴婢，困苦而布施者，是名惡人。是假名施，不名義施。如是施者，名無憐愍，不知恩報。是人未來雖得財寶，常失不集，不能出用，身多病苦。

（優婆塞戒經，卷第五）列二四一
右

修施與修慧

常樂修智慧，而不行布施；所生常聰哲，貧窶無財產。
唯樂行布施，而不脩智慧；所生得大財，愚闇無知見。
施慧二俱脩，所生具財智。二俱不修者，長夜處貧闇。

（分別業報略經）藏八九五左

十種淨施

菩薩摩訶薩，有十種淨施。何等爲十？所謂平等心施，無惡衆生故。隨意施，滿一切願故。無亂心施，不退轉故。隨應供施，分別了知福伽羅故。不選擇施，不求果報故。一向施，於一切物，心無著故。內外一切施，究竟清淨故。迴向菩提施，遠離有爲無爲故。教化成熟衆生施，乃至道場不捨離故。三種

圓清淨施，施者財物平等，清淨如虛空故。

（華嚴經第四十一離世間品）天九左

【略注】①福伽羅 Pūṅgala——譯云人。②三種圓清淨——關於施者、受者、財物三者清淨也。

有十種法得施波羅蜜

佛言：善男子！有十種法；諸菩薩摩訶薩，若能成就，即得施波羅蜜多。何等爲十？一者，成就法施。二者，成就無畏施。三者，成就財施。四者，成就無希望施。五者，成就慈愍施。六者，成就不輕慢施。七者，成就恭敬施。八者，成就供養施。九者，成就無所依施。十者，成就清淨施。

善男子！云何菩薩成就法施？所謂攝受正法，受持讀誦，無所希求，不爲利

養恭敬故，不爲名聞勝他故；唯爲一切苦惱有情，令罪銷滅。演說妙法，無所希望；如爲王、王子、及旃陀羅子，演說妙法，心尙無二；况爲一切大眾說法，心不平等？雖復行施，而不恃此，心生我慢。善男子！是名菩薩成就法施。善男子！云何菩薩成就無畏施？所謂菩薩，自捨離科罰，及一切器械；亦教他學捨離科罰，及一切器械。又復觀察一切有情，如父母想，如男女想，如親屬想。何故菩薩作如是念？如佛所說，一切衆生，未有不曾爲我父母、男女眷屬，於微細蟲，猶割身肉，而布施之；何况廣大有情，而令驚怖？是名菩薩成就無畏施。

善男子云！何菩薩成就財施？所謂菩薩，觀見一切有情，造極惡業；施財攝取，令彼遠離所作惡業，安置善處。復起思惟：佛說布施，是菩薩菩提；由布

施故，得斷三種不善之法：所謂慳吝、嫉妒、惡思。是故我應學於如來，隨所有財，常行布施；雖復施與，不起慢心。是名菩薩成就財施。

善男子！云何菩薩成就不希望施？所謂布施，終不爲自身故，不爲財物故，不爲眷屬故，不爲利養故。然諸菩薩行布施時，其心清淨，由是因緣，遠離一切希望報恩，而行布施。是名菩薩成就不希望施。

善男子！云何菩薩成就慈愍施？所謂菩薩，見諸有情，受於苦惱，飢渴貧露，衣服垢弊，孤獨無怙，無所依止，遠離福業，無所趣向；由此菩薩作是思惟，起慈愍心；我爲利益彼有情故，發阿耨多羅三藐三菩提心；此諸有情，受於苦惱，無歸無怙，無所依處，流轉生死；我當何時爲諸有情，爲歸爲怙，爲所依處，由是菩薩，慈愍纏心，於常常時，於恆恆時，隨所有物，施彼有情；雖

有饒益衆生善根，終不恃此，起於高慢。是名菩薩成就慈愍施。

善男子！云何菩薩成就不輕慢施？所謂施時，終不棄擲輕欺而與，曾無瞋嫌要頡之意，不恃富貴自在傲慢，非求多聞名稱憍逸；所施與時，歡喜恭敬，尊重讚歎，自手授與。是名菩薩成就不輕慢施。

善男子！云何菩薩成就恭敬施？所謂菩薩，見阿遮梨耶，^二鄔波馱耶，及修梵行，所有尊者，恭敬頂禮，問訊起居；但是所作種種善根，願我同作所作成。是名菩薩成就恭敬施。

善男子！云何菩薩成就供養施？所謂菩薩，供養三寶。云何供養佛？謂於如來制^四多之中，若華若香，若散若燒，及塗掃地；若制多破壞，應當修理，是名菩薩善供養佛。云何供養法？謂諸菩薩聽聞正法，若書寫受持，讀誦通利，

思惟修習，不顛倒思惟，不顛倒修習，是名菩薩供養法。云何供養僧？謂供給衣服飲食，臥具湯藥，下至水器，眾具皆足，是名菩薩善供養僧。如是供養佛法僧時，是名菩薩成就供養施。

善男子！云何菩薩成就無所依施？所謂菩薩行布施時，終不爲求天王位果，及生餘天，亦不求人王，及小王等，是名菩薩成就無所依施。

善男子！云何菩薩成就清淨施？所謂菩薩行施之時，觀察施物及能所施，皆非實有，離諸障礙，貪染過患，是名菩薩成就清淨施。

（寶雨經，卷第一）字六_三右左

【略注】①旃陀羅 Candala —— 極賤種，業屠殺者。②阿遮梨耶 Acarya —— 譯云軌

範師，即教授師也。③鄔波駄耶 Upadhyaya —— 譯云親教師。④制多 Caitya ——

譯云靈廟。積土石而造之塔也。中藏舍利。

⑤施物及能所施——施物、施者（能）、受

者（所）之三者也。此謂之三輪清淨施。

布施中有六波羅蜜

菩薩摩訶薩。見來求者。生一子想。是故任力多少施之。是則名爲施波羅蜜。菩薩施時。離於慳心。名尸波羅蜜。能忍一切求者之言。名忍波羅蜜。所施之物。手自授與。名精進波羅蜜。至心繫念。觀於解脫。名禪波羅蜜。不擇一切怨親之相。名般若波羅蜜。 （優婆塞戒經。卷第三）列二二九左

樂施當破五事

善男子！若欲樂施。當破五事：一者瞋心。二者慳心。三者妒心。四者惜身命。五者信因果。破是五事。常樂布施。 （優婆塞戒經。第四）列二三七右

布施有三礙

布施有三礙。何等三？我相，他相，施相。著是三相布施，是名世間檀那波羅蜜。何因緣故名世間？於世間中，不動不出，是名世間檀那波羅蜜。云何名世間檀那波羅蜜？所謂三分清淨。何等三？菩薩摩訶薩布施時，我不可得，不見受者，施物不可得，亦不望報。是名菩薩摩訶薩三分清淨檀那波羅蜜。

（摩訶般若波羅蜜經（小品）卷第七無生品）月三四六右

（八）持戒

在家菩薩之五戒

復次：長者！在家菩薩，應受善戒。所謂五戒：彼樂不殺，放捨刀杖，羞愧堅誓，不殺一切諸衆生等，不惱一切等心衆生，常行慈心。彼應不盜，自財知足，

於他財物，不生希望；除捨於貪，不起愚癡，於他封祿，不生貪著，乃至草葉，不與不取。離彼邪淫，自足妻色，不希他妻，不以染心視他女色；其心厭患，一向苦惱，心常背捨；若於自妻，生欲覺想，應生不淨驚怖之想，是結使力；是故爲欲，非我所爲，常生無常想，苦無我想，不淨之想。彼人應作如是思念：我當乃至不生欲念，况二和合體相摩觸。應離妄語，諦語實語，如說如作；不妄於他，善心成就，先思而行；隨所見聞，如實而說，守護於法；寧捨身命，終不妄語。彼應離酒，不醉不亂，不妄所說，不自輕躁，亦不嘲嘩，不相牽掣；應住正念，然後知之；若心欲捨一切財賄，須食與食，須飲施飲；若施他時，應生是念：今是檀波羅蜜時，隨彼所欲，我當給施；又我當使求者滿足。若施彼酒，當攝是人，得於正念，令無狂惑。何以故？悉滿他欲，是檀波羅蜜。

長者！是故菩薩以酒施人，於佛無過。長者！若在家菩薩，以此受持五戒功德，迴向阿耨多羅三藐三菩提，善護五戒。

（大寶積經，卷第八十二郁伽長者會）地五右八

受五戒者無所畏避

受佛五戒者，是福德之人，無所畏避。

（阿難問事佛吉凶經）宿六左七七

戒行之德

戒行之德，福應自然，天神擁護，感動十方。與天參德，功勳巍巍，衆聖嗟歎，難可稱量。智士達命，沒身不邪，善知佛教，可得度世之道。

（阿難問事佛吉凶經）宿六左七七

己所不欲勿勸他人

爾時勝思惟梵天白佛言：『世尊！何者是一法，而諸菩薩日夜防護？』爾時世尊語勝思惟菩薩言：『善男子！所謂菩薩己所不欲，勿勸他人。善男子！若有善男子，善女人，護持此法；彼善男子，善女人，護持如來一切戒藏。何以故？善男子！愛自命者，則不殺生；愛自財者，不盜他物；愛自妻者，不侵他妻。』

（無字寶篋經）字三三

若犯一戒即捨全戒

殺羣牛喻

昔有一人，有二百五十頭牛，常驅逐水草，隨時餵食。時有一虎，瞰食一牛。爾時牛主，即作是言：『已失一牛，俱不全足，用是牛爲？』即便驅至深坑

高岸，排著坑底，盡皆殺之。

凡夫愚人，亦復如是：受持如來具足之戒，若犯一戒，不生慚愧，清淨懺悔，便作念言：『我已破一戒，即不具足，何用持爲？』一切都破，無一在者。如彼愚人，盡殺羣牛，無一在者。

（百喻經，卷第二）藏八
七二一
右

孝名爲戒

孝順父母師僧三寶。孝順至道之法，孝名爲戒。

（梵網戒經，卷下）列一七
右

衆生受佛戒即入諸佛位

大衆心諦信！

汝是當成佛，

我是已成佛；

常作如是信，

戒品已具足。

一切有心者，皆應攝佛戒！衆生受佛戒，卽入諸佛位；位同大覺已，真是諸佛子。
（梵網戒經，卷下）列一七

破戒比丘譬如蝙蝠

舍利弗！譬如蝙蝠，欲捕鳥時，則入穴爲鼠；欲捕鼠時，則飛空爲鳥；而實無有鼠鳥之用，其身臭穢，但樂闇冥。舍利弗！破戒比丘，亦復如是：既不入於布薩自恣，亦復不入王者使役，不名白衣，不名出家；如燒屍殘木，不復中用。
（佛藏經，卷上）列二六

【略注】①布薩 Uposatha —— 說戒。又譯云淨住。出家法：每半月集衆誦戒經，互期護戒。在家法：每月六齋日，持八戒。②自恣 —— 三月夏安居竟日，卽七月十五日；僧衆集會，互舉犯戒之罪，或見，或聞，或疑，而懺悔之。

(九) 忍辱

忍辱最強

節身慎言，守攝其心；捨恚行道，忍辱最強。

(法句經，卷下念怨品)藏六一〇一
右

以忍爲先

沙門賢者，以忍爲先。當如清水，無所不淨。死人死狗，死蛇屎尿，亦皆洗之；然不毀水清。亦當持心，有如掃箒掃地淨不淨，死人死狗，死蛇屎尿，皆亦掃之，然不毀於箒矣。亦當復如風火之力光，死人死狗，死蛇屎尿，亦吹亦燒，然不毀風火之力光。若人欲來殺已，已亦不瞋；欲來壞已，已亦不瞋；欲來謗已，已亦不瞋；欲來笑已，已亦不瞋；欲來壞已，使不事佛法，已亦不瞋。

但當慈心正意，罪滅福生。邪不入正，萬惡消爛。

（堅意經）宿八
左一二

世忍與出世忍

善男子！忍有二種：一者世忍，二者出世忍。能忍飢渴寒熱苦樂，是名世忍。能忍信、戒、施、聞、智慧、正見無謬，忍佛法、僧、罵詈、搥打、惡口、惡事、貪、瞋、癡等，悉能忍之；能忍難忍，能作難作，名出世忍。

（優婆塞戒經，卷第七）列二
右五二

忍辱是菩提因

我身若被截斫分離，不應生瞋；應當深觀往業因緣，當修慈悲憐愍一切。如是小事，不能忍者，我當云何能調衆生？忍辱，即是菩提正因，阿耨多羅

三藐三菩提，卽是忍果。我若不種如是種子，云何獲得如是正果。

（優婆塞戒經第七）列二五二一左

（十） 精進

世出世間三種精進

善男子！菩薩精進，有二種相：一者世間，二者出世間。

云何菩薩世間精進？謂諸菩薩，精進勇猛，勤修三種世福業事。何等爲三？一者施福業事。二者戒福業事。三者修福業事。修此卽名三種精進。如是精進，緣諸衆生有漏有取，依諸果報，依諸福業，是名菩薩世間精進。如是精進，共諸聲聞獨覺乘等，此不名爲大甲冑輪，亦不由此名爲菩薩摩訶薩也；是名一切聲聞獨覺眞實福田。

云何菩薩出世精進大甲冑輪？謂諸菩薩，勇猛精進，於諸衆生，其心平等，除滅一切煩惱業苦。如是精進，一切賢聖，共所稱譽；無漏無取，無所依止；普於一切精進，懈怠，布施，慳貪，持戒，破戒，慈悲，忿恚，下、中、上、品諸衆生所；無差別心，無差別想，勇猛精進。普於三界一切衆生，平等無二，爲作事業，語言思惟，諸行依處，無所住著，勇猛精進。不觀諸有一切果報，勇猛精進。不依一切得與不得，勇猛精進。不依諸行，勇猛精進。不依三種世福業事，勇猛精進。具足出世三福業事，勇猛精進。是名菩薩出世精進大甲冑輪。

（地藏十輪經，卷第九福田相品）玄七_四右_一

精進之道

佛告二十億耳：「我今問汝！隨意答我！二十億耳！汝在俗時，善彈琴不？」

答言：「如是！世尊！」復問：「於意云何？汝彈琴時，若急其絃，得作微妙和雅音不？」答言：「不也。世尊！」復問：「云何若緩其絃，寧發微妙和雅音不？」答言：「不也。世尊！」復問：「云何善調琴絃，不緩不急，然後發妙和雅音不？」答言：「如是。世尊！」

佛告二十億耳：「精進太急，增其悼悔^二；精進太緩，令人懈怠；是故汝當平等修習攝受，莫著，莫放逸，莫取相。」時尊者二十億耳，聞佛所說，歡喜隨喜，作禮而去。

（雜阿含經，第九）辰二^{五一}左

【略注】①二十億耳——Sronakotivinsa 之意譯，佛弟子名。②悼悔——悼舉與追悔，

皆為心不安靜之煩惱也。

鸚鵡滅火

佛言：過去之世，雪山一面，有大竹林，多諸鳥獸，依彼林住。有一鸚鵡，名歡喜首。彼時林中，風吹兩竹，共相揩磨，其間火出，燒彼竹林；鳥獸恐怖，無歸依處。爾時鸚鵡，深生悲心，憐彼鳥獸，捉翅到水，以灑火上。悲心精勤，故感帝釋宮，令大震動。釋提桓因，以天眼觀，有何因緣？我宮殿動，乃見世間，有一鸚鵡，心懷大悲，欲救濟火，盡其身力，不能滅火。釋提桓因，即向鸚鵡所，而語之言：「此林廣大，數千萬里；汝之翅羽，所取之水，不過數滴，何以能滅如是大火？」鸚鵡答言：「我心弘曠，精勤不懈，必當滅火；若盡此身，不能滅者，更受來身，誓必滅之。」釋提桓因，感其志意，爲降大雨，火即得滅。爾時鸚鵡，今我身是也。

（雜寶藏經，卷第二佛以智水滅三火緣）宿十七左

海神還珠

神變化作人，與大意相見，問言：『聞卿得奇異之物，寧可借視之乎？』大意舒手，示其四珠。海神便搖其手，使珠墮水中。大意念言：『王與我言時，但道此珠難保，我幸已得之；今爲此子所奪，非趣也。』卽謂海神言：『我自勤苦，經涉嶮岨，得此珠來；汝反奪我，今不相還，我當杼盡海水耳。』海神知之，問言：『卿志何高，乃爾！海深三百三十六萬由延，其廣無涯，奈何竭之。譬如日終不墮地，大風不可攬束；日尙可使墮地，風尙可攬束，大海水終不可杼令竭也。』大意笑答之言：『我自念前後受身生死，壞積其骨，過於須彌山；其血流五河四海，未足以喻；吾尙欲斷是生死之根本，但此小海，何足可杼。』復說言：『我憶念昔供養諸佛，誓願言：令我志行

勇於道，決所向無難；當移須彌山，竭大海水，終不退意。」

便一其心，以器抒海水，精誠之感，達於第一四天王，來下助大意抒水三分，已抒其二。於是海中諸神王，皆大驚怖，共議言：「今不還其珠者，非小故也；水盡泥出，子便壞我宮室。」海神便出衆寶，以與大意，大意不取，告言：「不用是輩，但欲得我珠耳。促還我珠，終不相置也。」海神知其意感，便出珠還之。

（大意經）宙六六右左

第三章 內觀

（一） 宴坐

夏時安居

佛在舍衛城，爾時諸比丘，春夏冬一切時遊行，踏殺蟲草；擔衣物重，疲弊

道路。諸居士見譏訶言：「此諸外道沙門、婆羅門，尙知三時，夏則安居。衆鳥猶作巢窟，住止其中。而諸比丘不知三時，應行不行；常說少欲慈愍，護念衆生；而今踐踏，無仁惻心。無沙門行，破沙門法。」

諸長老比丘，聞種種訶責，以是白佛。佛以是事，集比丘僧，問諸比丘：「汝等實爾不？」答言：「實爾。世尊！」佛種種訶責已，告諸比丘：「不應一切時遊行，犯者突吉羅。從今聽夏結安居，結安居法。」

（五分律第十九第三分之三安居法）張二一八右

【略注】⊖安居——夏時雨季，爲萬物發生時期，且不便遊行；退而從事靜坐內省也。⊕

突吉羅 *Dukkata* (p) 戒律中罪名。易犯之輕罪也。

冥坐之道

夫宴坐者，不於三界現身意，是爲宴坐。

不捨道法，而現凡夫事，是爲宴坐。

不斷煩惱，而入涅槃，是爲宴坐。

若能如是坐者，佛所印可。

（維摩經、弟子品第三）黃七一六左

（二）制心

藏六如龜防意如城

昔佛在世時，有一道人，在河邊樹下學道。十二年中，貪想不除，走心散意，但念六欲，目色耳聲，鼻香口味，身更心法；身靜意遊，曾無寧息。十二年中，不能得道。佛知可度，化作沙門，往至其所，樹下共宿。須臾月明，有龜從河中出，來至樹下。復有一水狗，飢行求食，與龜相逢，便欲噉龜；龜縮其頭尾，

及其四脚，藏於甲中，不能得噉；水狗小遠，復出頭足，行步如故；不能奈何，遂便得脫。於是道人問化沙門：「此龜有護命之鎧，水狗不能得其便。」化沙門答曰：「吾念世人，不如此龜；不知無常，放恣六情，外魔得便，形壞神去；生死無端，輪轉五道，苦惱百千，皆意所造。宜自勉勵，求滅度安。」於是化沙門，卽說偈言：

有身不久，皆當歸土；形壞神去，寄住何貪？

心務造處，往來無端；念多邪僻，自爲招患；

是意自造，非父母爲；可勉向正，爲福勿回。

藏六如龜，防意如城；慧與魔戰，勝利無患。

於是比丘，聞說此偈，貪斷姪止，卽得羅漢道。知化沙門，是佛世尊；敬肅整

服，稽首佛足。

（法句譬喻經，第一心意品）藏六
七二右

【略注】○身更心法——更者，更樂之略，觸之古譯也。心法為心內一切諸法。

縱心與制心

縱此心者，喪人善事。制之一處，無事不辨。

（遺教經）辰十
一一三右

心染著與非染著

世尊告曰：比丘！心將世間去，心為染著，心起自在。比丘！彼將世間去，彼為染著，彼起自在。比丘！多聞聖弟子，非心將去，非心染著，非心自在。比丘！多聞聖弟子，不隨心自在，而心隨多聞聖弟子。

（中阿含經，卷第四十五心品心經）辰七
二〇右

心當隨人人莫隨心

心當隨人，人莫隨心。心者誤人，心殺身。心取羅漢，心取天，心取人，心取畜生蟲蟻鳥獸，心取地獄，心取餓鬼。作形貌者，皆心所爲。

（佛般泥洹經卷上）具十一四右

守意之福

作百佛寺，不如活一人；活十方天下人，不如守意一日。人得好意，其福難量。

（罵意經）宿八九右

自伏意與伏他意

人不能自伏意，反欲伏他人意。能自伏意，他人意悉可伏。

（三慧經）藏八二四左

（三） 觀心

如實知自心

佛言：菩提心爲因，大悲爲根本，方便爲究竟。祕蜜主！云何菩提？謂如實知自心。

（大日經、住心品第一）閏一左二

斷我慢一結一切結隨斷

世間有情，一結斷時；餘一切結，皆亦隨斷。云何一結？是謂我慢。所以者何？諸所有結，細中麤品，一切皆以我慢爲根；從我慢生，我慢所長。是故我慢一結斷時，餘一切結，皆亦隨斷。譬如世間樓觀中心，普爲樓觀衆分依止；中心若墜，餘亦隨墜。如是我慢，諸結所依；我慢若斷，餘亦隨滅。

（本事經、卷第一）辰六
二三
右

【略注】結——煩惱之異名，纏縛心志者也。

見我卽見佛

又問：『若得我實性，卽得實知見耶？』答言：『然。若見我實性，卽是實知見。譬如國王典金藏人，因已出用，知餘在者。如是因知我實性故，得實知見。』又問：『云何得我實性？』答言：『若得無我法。所以者何？我畢竟無根本，無決定故；若能如是知者，是名得我實性。』又言：『如我解文殊師利所說義：以見我故，卽是見佛。所以者何？我性卽是佛性。』

（思益梵天所問經論寂品第八）字一
一三左

觀我者觀佛

諸言觀我，我卽無我，是謂觀我。所以者何？夫觀我者，則觀諸法；觀諸法者，則觀佛也。佛者無形，亦不可見。

（十住除垢斷結經，卷第九身口意品）字三九〇右

（四）淨心

三毒去心如明鏡

譬如人有鏡，不明不見形。磨去其垢，即自見形。人已去貪婬、瞋恚、愚癡，譬如磨鏡。

（阿含正行經）宿八 一六右

洗滌心垢

慧人以漸，安徐精進，洗滌心垢，如工鍊金。
惡生於心，還自壞形；如鐵生垢，反食其身。

（法句經，卷下塵垢品）藏六 一〇二右

心端者力大

不但力士爲多力，能自端心，勝於力士。佛與心諍以來，其劫無數；不聽隨心，勤力精進，自致作佛。

（佛般泥洹經，卷上）頁十^{十二}左

世間生活與度世之道

念世間生活者，不得度世道，樂世間心不樂道。道從心起，心正者可得道。心小端，可得上天；明經者，可得作人。

（佛般泥洹經，卷上）頁十^{十二}左

心淨得度世

譬如溪水清，其中沙礫，青黃白黑，所有皆見。得道之人，但心清故，所視悉見；欲得道者，當淨其中心。如水渾濁，則無所見；持心不淨，不得度世。

（佛般泥洹經，卷上）頁十^{十四}右

心淨則佛土淨

若菩薩欲得淨土，當淨其心。隨其心淨，則佛土淨。

（維摩經，第一佛國品）黃七一五左

我淨則一切淨

我淨故施淨。施淨故願淨。願淨菩提淨。道淨一切淨。

（大集經，卷第十四虛空藏菩薩品）玄一八五左

前惡與後惡

前心作惡，如雲覆月；後心起善，如炬消闇。

（未曾有因緣經，卷下）宿八五八右

（五）無住心

應無所住而生其心

諸菩薩摩訶薩，應如是生清淨心；不應住色^一生心，不應住聲、香、味、觸、法生心；應無所住而生其心。

（金剛般若經）月九^{二〇}左

【略注】①色、聲、香、味、觸、法——謂之六塵，又云六境，眼、耳、鼻、舌、身、意之對象也。此中攝有形

無形之一切事物。

無住心學

解脫菩薩，而白佛言：『尊者！心無有住，有何修學？爲有學耶？爲無學耶？』
佛言：『菩薩無生之心，心無出入，本如來藏，性寂不動，亦非有學，亦非無學，無有學不學，是卽無學，非無有學，是爲所學。』

（金剛三昧經，無相法品）盈四^{五五}左

從無住本立一切法

不善不生，善法不滅。

問：「善不善孰爲本？」答曰：「身爲本。」

又問：「身孰爲本？」答曰：「欲貪爲本。」

又問：「欲貪孰爲本？」答曰：「虛妄分別爲本。」

又問：「虛妄分別孰爲本？」答曰：「顛倒想爲本。」

又問：「顛倒想孰爲本？」答曰：「無住爲本。」

又問：「無住孰爲本？」答曰：「無住則無本。從無住本，立一切法。」

（維摩經，觀衆生品第七）黃七_{二三}左

（六）念佛

念佛生天上

王又問那先：「卿曹沙門言：人在世間，作惡百歲，臨欲死時念佛，死後者皆生天上；我不信是語。復言：煞一生死，卽入泥犁中，我不信是也。」那先問王：「如人持小石，置水上，石浮耶？沒耶？」王言：「其石沒。」那先言：「如令持百枚大石，置船上，其船寧沒不？」王言：「不沒。」那先言：「船中百枚大石，因船故不得沒。人雖有本惡，一時念佛，用是不入泥犁中，便生天上。其小石沒者，如人作惡，不知佛經，死後便入泥犁。」王言：「善哉！善哉！」

（那先比丘經，卷下）藏八五〇左

【略注】①泥犁 Naraka —— 譯云地獄。

憶佛念佛去佛不遠

大勢至法王子，與其同倫五十二菩薩，卽從座起，頂禮佛足，而白佛言：我

憶往昔恆河沙劫，有佛出世，名無量光，十二如來，相繼一劫，其最後佛，名超日月光，彼佛教我念佛三昧。

譬如有人：一專爲憶，一人專忘。如是二人，若逢不逢，或見非見，二人相憶，二憶念深。如是乃至從生至生，同爲形影，不相乖異；十方如來，憐念衆生，如母憶子。若子逃逝，雖憶何爲？子若憶母，如母憶子；母子歷生，不相違遠。若衆生心，憶佛念佛，現前當來，必定見佛，去佛不遠；不假方便，自得心開，如染香人，身有香氣，此則名曰香光莊嚴。

我本因地，以念佛心，入無生忍；今於此界，攝念佛人，歸於淨土。

（首楞嚴經，卷第五）成一〇左

念佛之道

應淨洗浴，著鮮潔衣，菜食長齋，勿噉辛臭。於寂靜處，莊嚴道場，正念結伽，或行或坐，念佛身相，無使亂心；更莫他緣，念其餘事。或一日夜，或七日夜，不作餘業，至心念佛，乃至見佛。小念見小，大念見大，乃至無量念者，見佛色身，無量無邊。

（大集經卷第四十三日藏分念佛三昧品）玄三四五右

菩薩念佛

入滅受想定，住此定中，一切三受三行斷滅；心無行動，諸受想思觸作意等，悉皆斷滅。安住此定，或一日夜，或復乃至七日夜，受定味食。從此定起，其心寂靜，無所取著，宴然而住，復入勝義究竟空定。住此定中，其心平等，無所取著，猶若虛空。身諸毛孔，皆出霜液，狀如昴星，滅除一切鬱蒸結縛。從此定起，得正憶念，最勝喜樂，充遍其身；如大自在天子，入現一切樂定。

身諸毛孔，皆遍受樂。

如是菩薩，樂觸其身，便思念佛。思念佛故，則唯見佛，不見餘相。菩薩爾時，若念一佛，則見一佛；若念多佛，則見多佛；若念小身佛，則見小身佛；若念大身佛，則見大身佛；若念無量身佛，則見無量身佛。若念自身，爲佛身相；則見自身，同於佛身，衆相圓滿。若念他身，爲佛身相；則見他身，同於佛身，衆相圓滿。若念一切情非情數，所有色像，爲佛身相；則見一切情非情數，所有色像，皆同佛身，衆相圓滿，不見其餘一切色像。菩薩爾時，便作是念：一切諸法，一切色像，皆如幻等，諦實不虛。

（地藏十輪經，卷第十福田相品）玄七 四四左
四五右

一行三昧

法界一相，繫緣法界，是名一行三昧。

若善男子，善女人，欲入一行三昧，當先聞般若波羅蜜，如說修學；然後能入一行三昧，如法界緣，不退不壞，不思議，無礙無相。

善男子，善女人，欲入一行三昧，應處空閑，捨諸亂意，不取相貌，繫心一佛，專稱名字；隨佛方所，端身正向，能於一佛，念念相續。即是念中，能見過去、未來、現在諸佛。何以故？念一佛功德無量無邊，亦與無量諸佛功德無二不思議。佛法等無分別，皆乘一如，成最正覺，悉具無量功德，無量辯才。如是入一行三昧者，盡知恆沙諸佛法界無差別相。

（文殊般若經，卷下）月九右

（七） 觀佛

觀佛無常空無義

若欲禮佛者，及諸最勝者，陰持入諸種，皆悉觀無常。
曩昔過去佛，及以當來者，如今現在佛，此皆悉無常。
若欲禮佛者，過去及當來，說於現在中，當觀於空法。
若欲禮佛者，過去及當來，現在及諸佛，當計於無我。
此中無我無命，無人無造作，亦無形容，有教有授者，諸法皆悉空寂。何者
是我，我者無主；我今歸命眞法之聚。

（增壹阿含經，聽法品第三十六）是二四四
左

觀佛則心不異佛

佛告父王：如是！如是！未來世中，諸善男子，善女人等，及與一切；若能至心，

繫念在內，端坐正受，觀佛色身；當知是人，心如佛心，與佛無異。雖在煩惱，不爲諸惡之所覆蔽。於未來世，雨大法雨。

（觀佛三昧海經，六譬品第一）黃五左一

觀佛之心

諸佛如來，以大慈悲，而以爲心；戒、定、慧、解脫、解脫知見，而以爲身；十力、四無所畏、十八不共法、大悲、三念處，而自莊嚴。如是觀者，名觀佛心。

（觀佛三昧海經，觀相品第三之四）黃五左一八

佛心者大慈悲是

無量佛有八萬四千相；一一相中，各有八萬四千隨形好；一一好中，復有八萬四千光明；一一光明，遍照十方世界，念佛衆生，攝取不捨。其光明相

好，及與化佛，不可具說；但當憶想，令心眼見。見此事者，即見十方一切諸佛；以見諸佛故，名念佛三昧。作是觀者，名觀一切佛身；以觀佛身故，亦見佛心。諸佛心者，大慈悲是。以無緣慈，攝諸衆生。

（觀無量壽佛經）地十二七九左

是心是佛

次當想佛。所以者何？諸佛如來，是法界身，遍入一切衆生心想中。是故汝等心想佛時，是心即是三十二相，八十隨形好；是心作佛，是心是佛，諸佛正遍知海，從心想生。是故應當一心繫念，諦觀彼佛多陀阿伽度阿羅呵三藐三佛陀。

（觀無量壽佛經）地十二七九右

【略注】①正遍知——三藐三菩提 Sanyak-sambodhi 之音譯。②多陀阿伽度Tath

agata —— 譯云如來。 ③阿羅訶 Arhat —— 同阿羅漢。譯云應供。

(八) 觀衆生

一切衆生具足如來智慧

爾時如來，以無障礙清淨天眼，觀察一切衆生；觀已，作如是言：奇哉！奇哉！云何如來具足智慧，在於身中，而不知見。我當教彼衆生，覺悟聖道；悉令永離妄想顛倒垢縛，具見如來智慧，在於身內與佛無異。

（華嚴經，第三十五性起品）天八 七二左

衆生性

如是法性，無量無邊；爲諸煩惱之所隱覆，隨生死流，沉沒六道，長夜輪轉，隨衆生故，名衆生性。

（勝天王般若經，卷第三法性品）月八 七〇左

衆生自性清淨應尊重

諸佛如來，悉知衆生自性清淨，客塵煩惱之所覆蔽，不入自性。是故菩薩摩訶薩，行般若波羅蜜，應作是念：我當勇猛勤修精進，爲諸衆生說，是甚深般若波羅蜜，除其煩惱。一切衆生，皆有性淨；是故於彼，勿生下劣。應當尊重；彼卽我師，如法恭敬。菩薩摩訶薩，作如是心，卽生般若闍那^二大悲。

（勝天王般若經，卷第三法性品）月八^{七〇}右

【略注】①般若 Prajñā —— 通常譯云智慧。 ②闍那 Jñāna —— 譯云智。

衆生身中有如來

是如來界，無量無邊。諸煩惱穀之所隱蔽，隨生死流，漂沒六道，無始輪轉，我說名衆生界。

菩薩見已，除衆生相，除法界相，除大結相；依無礙智，於衆生相續中，觀如來界，興奇異想：咄哉衆生！如來卽在衆生身內，如理不見如來。

（無上依經、卷上如來界品）宙七
七九
左

衆生界自性清淨

一切如來，昔在因地，知衆生界自性清淨，客塵煩惱之所污濁。諸佛如來，作是思惟：客塵煩惱，不入衆生清淨界中。此煩惱垢，爲外障覆虛妄思惟之所構起；我等能爲一切衆生，說深妙法，除煩惱障。不應生下劣心。以大
量故，於諸衆生，生尊重心，起大師敬起般若，起闍那，起大悲。依此五法，菩薩得入阿鞞跋致位。

（無上依經、卷上如來界品）宙七
七九
右

【略注】①阿鞞跋致 Avaiṣṭi ——譯云不退轉。於成佛之進路，能不退轉。爲菩薩修行階位之一。

不說餘菩薩過咎

若說菩薩過咎，則遠阿耨多羅三藐三菩提，亦受業障罪。若說菩薩威儀過罪，則遠阿耨多羅三藐三菩提。若菩薩於他菩薩生下想，於已生勝想，則爲自傷，亦受業障罪。若菩薩欲教餘菩薩，當生佛想，然後教之。菩薩若欲不捨阿耨多羅三藐三菩提，不應生心輕恚餘菩薩。

（諸法無行經，卷下）字二二六左

於一切衆生作世尊想

從今以後，我等當於一切衆生，生世尊想。

所以者何？我等無有如是智慧；何等衆生，有菩薩根？何等衆生，無菩薩根？我等不知如是事故；或於衆生，生輕慢心，則爲自傷。

（首楞嚴三昧經卷下）黃七左八

第四章 世道與佛道

（一）三解脫門

三三昧

此三三昧，云何爲三？空三昧，無願三昧，無想三昧。

彼云何名爲空三昧？所謂空者，觀一切諸法，皆悉空虛，是謂名爲空三昧。彼云何名爲無想三昧？所謂無想者，於一切諸法，都無想念，亦不可見，是謂名爲無想三昧。云何名爲無願三昧？所謂無願者，於一切諸法，亦不願

求，是謂名爲無願三昧。如是比丘有不得此三三昧，久在生死，不能自覺悟。如是諸比丘，當求方便，得此三三昧。

（增壹阿含經，卷第十六）辰一 六九 右

三解脫門

諸根如幻，境界如夢，一切諸法，悉皆空寂，此名空解脫門。空無空相，名無相解脫門。若無有相，卽無願求，名無願解脫門。如是三法，與空共行，涅槃先道，當如是學。
（父子合集經，卷第十六，六界差別品）地十 五六 右

不信諸法非佛弟子

時諸菩薩，以此蓮華，欲散十方。佛以手摩，一一華中，佛身悉現。此諸化從空而去，亦作是言：若有衆生，不信諸法空如幻化，無相無緣，是諸衆生，佛

不爲師，非佛弟子。卽說偈言：

諸法空無相，無取無所緣，一切如幻化，亦如水中月。
不以空故空，性本常自爾；是名佛所說，最上微妙法。
諸法空無相，亦復無有我，若人如是知，則爲無貪諍。
若人樂是法，佛則是其師；我等以佛力，當遊於十方。

（華手經網明品第三）字五右四

菩薩行

雖行於空，而植衆德本，是菩薩行。

雖行無相，而度衆生，是菩薩行。

雖行無作，而現受身，是菩薩行。

（維摩經問疾品第五）黃七二右

魔力菩薩力

爾時波旬，爲文殊師利力所持故，答言：「天子！愚癡之力，是爲魔力；慧明之力，是菩薩力。憍慢之力，是爲魔力；大智慧力，是菩薩力。諸邪見力，是爲魔力；空無相無作力，是菩薩力。諸顛倒力，是爲魔力；正真諦力，是菩薩力。我我所力，是爲魔力；大慈悲力，是菩薩力。貪瞋癡力，是爲魔力；三解脫力，是菩薩力。生死之力，是爲魔力；無生無滅，無有諸行，無生忍力，是菩薩力。」

（大方廣寶篋經，卷中）字十四八右

【略注】①波旬 Pāpīyan —— 惡魔名。②我我所 —— 「我」者，自我之本體。「我所」者，屬於自我之一切事物也。

無爲法無利無功德

有爲法者，可謂有利，有功德。

夫出家者，爲無爲法。無爲法中，無利，無功德。

（維摩經、弟子品第三）黃七一
右九

（二） 解脫

自想爲縛

文殊問魔：「誰爲繫汝？」報曰：「不知誰爲縛我。」答曰：「波旬！卽不被縛，自想爲縛。一切愚癡，凡夫之士，其亦若茲。心本悉淨，無所思念，志在想著；不知無常，計有常想；苦爲樂想，無身計身，不淨淨想，無色色想，無痛癢思想，生死識，而想五陰。如今波旬，惡畏繫縛，何因得脫。」

（魔逆經）字二四六
右

無縛無解

一切凡夫，憶想分別，顛倒取相，是故有縛。動念戲論，是故有縛。見聞覺知，是故有縛。

此中實無縛者，解者。所以者何？諸法無縛，本解脫故。諸法無解，本無縛故。常解脫相，無有愚癡。

（首楞嚴三昧經，卷下）黃七左

不著諸法故成佛道

若見有爲法，與無爲法異；是人終不得，脫於有爲法。若知二性同，必爲人中尊。佛不見菩提，亦不見佛法，不著諸法故，降魔成佛道。

（諸法無行經，卷下）字二二七左

不見諸法差別成就衆生

舍利弗言：「汝於諸法，見無差別，云何能成就衆生？」女答言：「尊者舍利弗！若於諸法，見差別者，是則不能成就衆生；若於諸法，不見差別，是則必能成就衆生。」舍利弗問女言：「汝今爲已成就幾所衆生？」女答言：「如尊者舍利弗所斷煩惱。」舍利弗言：「我所斷煩惱，性無所有。」女言：「衆生之性，亦無所有。」舍利弗言：「無性衆生，何所成就？」女言：「煩惱無性，復何所斷？」舍利弗言：「無分別故，是名爲斷。」女言：「如尊者舍利弗所言：若不分別彼我，是亦名爲成就衆生。」舍利弗復問女言：「云何名衆生成就？」女答言：「於諸有中，不起染愛，是名衆生成就。」

（轉女身經）字九
左七二

（二二） 菩提

覺一切法空名爲菩提

若得修行正念法者，彼無一法，非是佛法。何以故？以覺一切法空故。文殊師利！覺一切法空者，名爲菩提。菩提者，名覺一切法空。

（如來莊嚴智慧光明入一切佛境界經，卷下）字三二〇右

覺一切實性名爲菩提

身之實性，是菩提實性；菩提實性，是心實性；心之實性，卽是一切法之實性。覺是一切諸實性，故名覺菩提。

（如來祕密藏經，卷下）字十七左

戲論與菩提

奮迅慧菩薩言：『善男子！言菩提者，於何法而說？』

無所發菩薩言：『善男子！言菩提者，無分別，無戲論法，卽其言也。善男子！見我者，名爲戲論，此非菩提；遠離我見，無有戲論，名爲菩提。善男子！著我所者，名爲戲論，此非菩提；遠離我所，無有戲論，名爲菩提。隨順老病死者，名爲戲論，此非菩提；不隨順老病死，寂靜無戲論，名爲菩提。慳、嫉、破戒、瞋、恨、懈怠、散亂、愚癡、無智、戲論，此非菩提；布施、持戒、忍辱、精進、禪定、智慧，無戲論法，名爲菩提。邪見、惡覺觀、惡願，名爲戲論，此非菩提；空、無相、無願，無戲論法，名爲菩提。』

（法集經，第三）字七
五四
右

一切法是菩提亦非菩提

復次：善男子！亦得言一切法是菩提，亦得言一切法非爲菩提。問曰：『以何義故？一切法名爲菩提，一切法非菩提。』答言：『於一切法，著我我所，

此非菩提；覺一切法平等，知一切法真如，名爲菩提。』

（法集經，第三）字七五四右

四種菩提

有四種菩提無上勝果。何等爲四？一者最淨，二者真我，三者妙樂，四者常住。
（無上依經，卷上菩提品）宙七八〇左

空無所有是乃爲道

淨而復淨，空而復空；空無所有，是乃爲道。

道之本無，無所倚着，上無所攀，下無所據，左無所牽，右無所持，自然而立，清淨爲本，空空之空，故曰泥洹。於有而無所有，故爲有；於無而不無，是爲無；於得而無所得，是爲得也。
（菩薩內習六波羅蜜經）藏五三二右

(四) 涅槃

泥洹第一樂

無病第一利，知足第一富，知親第一友，泥洹第一樂。

(出曜經，卷第二十三泥洹品) 藏六_{二三}右

【略注】①泥洹——涅槃之古譯。

真人歸滅

鹿歸於野，鳥歸虛空，義歸分別，真人歸滅。

(出曜經，卷第二十三泥洹品) 藏六_{二三}右

【略注】①分別——思量識別諸法之事理也。義理由分別思量而發揮。②滅——Niro

ḍha 之意譯，由八正道而到之寂靜境界也。

涅槃之快

彌蘭王復問那先言：「其不得泥洹道者，寧知泥洹道爲快不？」那先言：「然。雖未得泥洹道，由知泥洹道爲快。」王言：「人未得泥洹道，何以故知快耶？」那先問王言：「人生未嘗截手足，寧知截手足爲痛劇不？」王言：「雖未曾更截手足，猶知爲痛。」那先言：「何用知爲痛？」王言：「見其人截手足呻呼，用是故知爲痛。」那先言：「人前有得泥洹道者，轉相語泥洹道快，用是故信之。」王言：「善哉！善哉！」

（那先比丘經，卷下）藏八四八左

二種涅槃

有此二法涅槃界。云何爲二？一有餘涅槃界，無餘涅槃界。彼云何名爲有餘

涅槃界？於是比丘，滅五下分結，卽彼般涅槃，不還來此世；是謂名爲有餘涅槃界。彼云何名爲無餘涅槃界？於是比丘，盡有漏，成無漏，意解脫，智慧解脫；自身作證，而自遊戲生死已盡，梵行已立，更不受有，如實知之；是謂名爲無餘涅槃界。此二涅槃界，當求方便至無餘涅槃界。

（增壹阿含經、卷第七）是二七左

【略注】①有餘涅槃——對無餘涅槃而言。此有種種之解釋：餘者，或爲餘身，或爲餘習。有者，對於迷界之存在，尙未完全斷絕關係；但已斷煩惱，已絕未來生死之因，而名涅槃也。

②五下分結——在欲界縛吾人之五種煩惱。貪、瞋、身見、戒取見、疑是也。身見卽我見，卽迷執自我之偏見也。戒取見者，過信自己之德義，無向上之意也。

何謂涅槃

爾時大慧菩薩摩訶薩復白佛言：「世尊！諸佛如來所說涅槃，說何等法，名為涅槃？」

佛告大慧：「一切識自性習氣，及藏識、意識、意識見習轉已，我及諸佛說名涅槃。卽是諸法性空境界。」

復次：大慧！涅槃者，自證聖智所行境界，遠離斷常，及以有無。云何非常？謂離自相共相諸分別故。云何非斷？謂去來現在一切聖者自證智所行故。復次：大慧！大般涅槃，不壞不死。若死者，應更受生；若壞者，應是有爲；是故涅槃，不壞不死；諸修行者之所歸趣。

復次：大慧！無捨無得故，非斷非常故，不一不異故，說名涅槃。」

（入楞伽經，集一切法品第二之三）黃六九四左

【略注】①習氣——種子經驗之印象，保持於心識中，由各自性而發現，乃謂之現行。②藏識、意識——藏識者，阿黎耶，即第八識也。意者，末那，即第七識。意識者，第六識也。③自證聖智——如人飲水，冷暖自知，自覺之認識也。④自相共相——一切法有二相：局於自體者，謂之自相。通他者，謂之共相。

(五) 煩惱與菩提

一切煩惱為如來種

譬如高原陸地，不生蓮華；卑濕淤泥，乃生此華。如是見無為法，入正位者，終不復能生於佛法；煩惱泥中，乃有衆生起佛法耳。又如植種於空，終不能生，糞壤之地，乃能滋茂。如是入無為正位者，不生佛法；起於我見，如須彌山，猶能發於阿耨多羅三藐三菩提心，生佛法矣。

是故當知，一切煩惱，爲如來種。

譬如不下巨海，不能得無價寶珠。如是不入煩惱大海，則不能得一切智寶。

（維摩經，佛道品第八）黃七二四右

【略注】①無爲正位——小乘之涅槃，謂之無爲。又謂之正位。此涅槃由斷盡煩惱而得。大

乘佛教改變煩惱觀，隨而變易涅槃觀，轉煩惱，即得佛法，故以煩惱爲如來種。②我見

——以五蘊和合之心身，認爲常住之實體，謂之我見。一切煩惱之根原也。③一切智

——佛智也。

高原陸地不生蓮華

迦葉！譬如種在空中，而能生長；從本已來，無有是處。菩薩取證，亦復如是。增長佛法，終無是處。迦葉！譬如種在良田，則能生長。如是迦葉！菩薩亦爾。

有諸結使，離世間法，能長佛法。迦葉！譬如高原陸地，不生蓮華。菩薩亦復如是：於無爲中，不生佛法。迦葉！譬如卑濕淤泥中，乃生蓮華。菩薩亦爾：生死淤泥邪定衆生，能生佛法。

（大寶積經，卷第一百二十二普明菩薩會）地六五八右

【略注】（一）邪定——一切衆生，分爲正定、邪定、不定之三聚。邪定者，定於邪惡之位也。

斷煩惱者非佛法器

大德須菩提語文殊師利：「法性是一如一實際，云何分別說器、非器？」
文殊師利言：「大德須菩提！譬如陶家，以一種泥，造種種器。一火所熟，或作油器、蘇器、蜜器，或盛不淨。然是泥性，無有差別；火然亦爾，無有差別。如是如是。大德須菩提！於一法性一如一實際，隨其業行，器有差別。蘇油器

者，喻聲聞緣覺；彼蜜器者，喻諸菩薩；不淨器喻小凡夫。」

須菩提言：「文殊師利！頗有是器，說名非器，非器為器。」文殊師利言：「

有。」須菩提言：「何者是也？」文殊師利言：「大德！須菩提！一切結使，名

為非器。一切結習，名為非器。是名非器，是亦說名為佛法器。若斷一切諸

煩惱者，如是之器，非佛法器。」（大方廣寶篋經，卷上）字十_{四三}右

【略注】①法性如實際——皆真如之異名，謂之三空。立差別萬法之本性，而觀照其平等

一相也。②結使、結習——結者，煩惱之異名；以繫縛衆生，在生死界。使者，亦煩惱之異

名；以驅使衆生者也。習者，煩惱之餘氣，即習氣也。③非器佛法器——煩惱及習氣，為

非器。反之，則為法器。今此以斷煩惱為法器者，大乘之煩惱觀也。

於第一義煩惱菩提不二

菩薩未成佛時，以菩提爲煩惱。菩薩成佛時，以煩惱爲菩提。何以故？於第一義，而不一二故。諸佛如來，乃至一切法如故。

（仁王般若經，卷上二諦品）月九五〇右

【略注】（一）如——諸法之實相，或云法性，或云實際。由第一義上觀之；一切悉爲真如，其間無有差別，故云不二。

煩惱無自性是無生法

佛言：迦葉！解知煩惱從因緣生，名得菩提。迦葉！云何爲解知從因緣所生煩惱？解知是無自性起法，是無生法，如是解知，名得菩提。

（大方廣如來祕密藏經，卷下）字十七右

【略注】（一）無自性起——自性者，有固定性之實體也。佛教認爲由因緣，乃有萬物；一切皆

爲流動轉變，否認有自性，故云無自性起。⊖無生法——不生不滅者。

以諸法而作佛事

有此四魔^一八萬四千^二諸煩惱門。而諸衆生，爲此疲勞，諸佛卽以諸法，而作佛事。

（維摩經，菩薩行品第十一）黃七^{二七}右

【略注】⊖四魔——煩惱、陰、死、天之四種魔。魔者，破壞人之善事，故名。⊖八萬四千煩惱

門——煩惱之根本，爲貪、瞋、癡，等分之四種。各有二千一百種，合爲八千四百十倍之，成八萬四千之數。

轉無明爲明

雪山有草，名曰肥膩，牛若食者，純得醍醐。無有青黃赤白黑色穀草，因緣其乳，則有色味之異。

是諸衆生，以明無明業因緣故，生於二相。若無明轉，則變爲明。一切諸法，善不善等；亦復如是，無有二相。

（大般涅槃經，第八如來性品）盈五四左○

（六） 生死與涅槃

世間性涅槃性平等

能說空者，善男子！云何知世間性涅槃性，是二平等，不生於疑？知能說空者，善男子！若見離世間性，有涅槃性；如是菩薩，不知見空。若見世間真如性，涅槃真如性，此二法性，唯是一相。所謂無爲之性。若見世間真如性，涅槃真如性，其相平等，無有高下。

（法集經，卷第一）字七四五右

無出生死無入涅槃

於諸法性無心故，一切法名爲正。若於無心法中，以心分別觀者，一切法名爲邪。

當知！佛不令衆生出生死入涅槃；但爲度妄想分別生死涅槃二相者耳。此中實無度生死至涅槃者。所以者何？諸法平等，無有往來；無出生死，無入涅槃。

爾時網明菩薩白佛言：世尊！若有於法生見，則於其人，佛不出世。世尊！若有決定見涅槃者，是人不得生死。所以者何？涅槃名爲除滅諸相，遠離一切動念戲論。世尊！是諸比丘，於佛正法出家，而今墮於外道邪見，見涅槃決定相。譬如從麻出油，從酪出酥。世尊！若人於諸法滅相中，求涅槃者；我說是輩，皆爲增上慢人。世尊！正行道者，於法不作生，不作滅，無得，無果。

（思益梵天所問經、分別品第三）字一四三左

愛涅槃者不得涅槃

認一切我，爲涅槃故。有證有悟，名成就故。譬如有人，以賊爲子；其家財寶，終不成就。何以故？有我愛者，亦愛涅槃；伏我愛根，爲涅槃相。有憎我者，亦憎生死；不知愛者，真生死故；別憎生死，名不解脫。

（圓覺經）天十一九三左

【略注】○以賊爲子——此愛涅槃，而憎生死者，卽不離「我」執，真入涅槃，必須離取捨之相，入空，無相二解脫，住於無願解脫。若於生死涅槃分別執著，對於涅槃而生我愛者，則反爲害，名之爲賊。

（七）世道與佛道

若能轉物則同如來

一切衆生，從無始來，迷己爲物，失於本心，爲物所轉。故於是中，觀大觀小，若能轉物，則同如來。身心圓明，不動道場；於一毛端，徧能含受十方國土。

（首楞嚴經，卷第二）成一左六

魔界與佛界

魔界如，卽如是佛界如。魔界如，佛界如，不二不別。

（首楞嚴三昧經，卷下）黃七右九

見菩薩法則遠菩薩

實相無貪恚， 癡亦不可得。 分別如幻法， 自生煩惱熱。
實相無煩惱， 無衆生無佛。 分別無生法， 凡夫願作佛。

不見諸佛法，亦不見衆生；知是法相者，疾成衆生尊。
若人求菩提，則無有菩提；是人遠菩提，譬如天與地。
知諸法如幻，速成人中上。
（諸法無行經，卷上）字二二右

不見男女差別

爾時尊者舍利弗，復問無垢光女言：「汝從淨住世界無垢稱王佛所，受此女身，來此間也？」無垢光女答言：「尊者舍利弗！彼佛世界，無有女人。」
舍利弗言：「汝今何故以此女形，來生此間？」女即答言：「我今不以男形、女形，亦不以色、受、想、行、識來生此間。所以者何？尊者舍利弗！於意云何？如來所作化人，從一佛國，至一佛國，爲有男女陰界諸入差別相不？」舍利弗言：「不也。所以者何？如來所化，無有差別。」女言：「尊者舍利弗！如

如來所化，無有差別；一切諸法，皆悉如化。若知諸法，悉同化相；從一佛國，至一佛國，不見差別。』

（轉女身經）字九七二右

（八） 修行生活

甲、願行具足

大願大行

發趾向道；	當願衆生，	趣佛菩提，	究竟解脫。	若已在道；
得不動地。	三昧正受；	當願衆生，	向三昧門，	得究竟定。
坐佛道樹，	心無所倚。	結跏趺坐；	當願衆生，	善根堅固，
當願衆生，	敷善法座，	見真實相。	正身端坐；	當願衆生，
若入房舍；	當願衆生，	昇無上堂，	得不退法。	若敷牀座；

當願衆生，	成就佛道，	無餘所行。	涉路而行；	當願衆生，
履淨法界，	心無障礙。	見趣高路；	當願衆生，	昇無上道，
超出三界。	見趣下路；	當願衆生，	謙下柔軟，	入佛深法。
若見險路；	當願衆生，	棄捐惡道，	滅除邪見。	若見直路；
當願衆生，	得中正意，	身口無曲。	見道揚塵；	當願衆生，
永離塵穢，	畢竟清淨。	見道無塵；	當願衆生，	大悲所熏，
心意柔潤。	見深坑澗；	當願衆生，	向正法界，	滅除諸難。
見聽訟堂；	當願衆生，	說甚深法，	一切和合。	若見大樹；
當願衆生，	離我諍心，	無有忿恨。	若見叢林；	當願衆生，
一切敬禮，	天人師仰。	若見高山；	當願衆生，	得無上善，

莫能見頂。	若見荆棘；	當願衆生，	拔三毒刺，	無賊害心。
見樹茂葉；	當願衆生，	以道自蔭，	入禪三昧。	見樹好華；
當願衆生，	開淨如華，	相好滿具。	見樹豐果；	當願衆生，
起道樹行，	成無上果。	見諸流水；	當願衆生，	得正法流，
入佛智海。	若見陂水；	當願衆生，	悉得諸佛，	不壞正法。
若見浴池；	當願衆生，	入佛海智，	問答無窮。	見人汲井；
當願衆生，	得如來辯，	不可窮盡。	若見泉水；	當願衆生，
善根無盡，	境界無上。	見山澗水；	當願衆生，	洗濯塵垢，
意解清淨。	若見橋梁；	當願衆生，	興造法橋，	度人不休。
見脩園圃；	當願衆生，	耘除穢惡，	不生欲根。	見無憂林；

當願衆生，	勤修衆善，	而自莊嚴。	見志樂人；	當願衆生，	得無上樂，	得佛智慧。	見疾病人；	當願衆生，	遠離鄙惡，
心得歡喜，	具足菩提。	見素服人；	當願衆生，	於有爲法，	澹泊無患。	見強健人；	當願衆生，	歡喜恭敬，	以善自嚴。
永除憂惱。	見嚴飾人；	當願衆生，	清淨法樂，	心生厭離。	見苦惱人；	當願衆生，	知身空寂，	諸佛菩薩。	見報恩人；
見好園池；	當願衆生，	究竟得到，	以道自娛。	見歡樂人；	當願衆生，	得金剛身，	解脫衆苦。	見醜陋人；	當願衆生，
當願衆生，	三十二相，	頭陀彼岸。	見愁憂人；	當願衆生，	滅除衆苦，	無有衰耄。	見端正人；	當願衆生，	常念諸佛，

若燕食時；	當願衆生，	禪悅爲食，	法喜充滿。	所食雜味；
心意柔輒。	得麤齷食；	當願衆生，	永得遠離，	世間愛味。
具足成滿，	無願三昧。	得柔輒食；	當願衆生，	大慈所熏，
當願衆生，	知節少欲，	情無所著。	得不美食；	當願衆生，
見無慚愧；	當願衆生，	離無慚愧，	普行大慈。	得香美食；
明達三世。	見漸愧人；	當願衆生，	慚愧正行，	調伏諸根。
得上妙色，	天人讚歎。	入里乞食；	當願衆生，	入一佛乘，
當願衆生，	明達遠照，	功德自在。	若見妙色；	當願衆生，
若見城郭；	當願衆生，	得金剛身，	心不可沮。	若見王都；
菩薩恩德。	見背恩人；	當願衆生，	常見賢聖，	不作衆惡。

當願衆生，	得佛上味，	化成甘露。	當願衆生，
德行充盈，	成十種力。	若說法時；	當願衆生，
深達佛法。	退坐出堂；	當願衆生，	深入佛智，
若入水時；	當願衆生，	深入佛道，	等達三世。
當願衆生，	身心無垢，	光明無量。	若洗足時；
得四神足，	究竟解脫。	昏夜寢息；	當願衆生，
心淨無穢。	晨朝覺寤；	當願衆生，	一切知覺，
		當願衆生，	不捨十方。

（華嚴經，第六淨行品）天七二九左
三二一右

普賢十大行願

爾時普賢菩薩摩訶薩，稱歎如來勝功德已，告諸菩薩及善財言：善男子！

如來功德，假使十方一切諸佛，經不可說不可說佛刹極微塵數劫，相續演說，不可窮盡。若欲成就此功德門，應修十種廣大行願。何等爲十？一者，禮敬諸佛。二者，稱讚如來。三者，廣修供養。四者，懺悔業障。五者，隨喜功德。六者，請轉法輪。七者，請佛住世。八者，常隨佛學。九者，恆順衆生。十者，普皆回向。

（華嚴經·普賢行願品第四十）天六
七四左

乙、信行並脩

菩提心行

若聞譏毀，心能堪忍。若聞讚歎，反生慚愧。脩行道時，歡喜自慶。不生憍慢，能調惡人。見離壞衆，能令和合。揚人善事，隱他過咎。人所慚恥處，終不宣說。聞他祕事，不向餘說。不爲世事，而作咒誓。少恩加已，思欲大報。於已怨

者，恆生善心。怨親等苦，先救怨者。見有罵者，反生憐愍。見他偷時，默然不動。見來打者，生於悲心。視諸衆生，猶如父母。寧喪身命，終不虛言。

（優婆塞戒經，卷第二）列二一九右

常不輕慢

爾時有一菩薩比丘，名常不輕。以何因緣，名常不輕？是比丘凡有所見，若比丘，比丘尼，優婆塞，優婆夷，皆悉禮拜讚歎，而作是言：我深敬汝等，不敢輕慢。所以者何？汝等皆行菩薩道，當得作佛。而是比丘，不專讀誦經典，但行禮拜；乃至遠見四衆，亦復故往禮拜讚歎，而作是言：我不敢輕於汝等，汝等皆當作佛。

四衆之中，有生瞋恚，心不淨者，惡口罵詈，是無智比丘！從何所來。自言：我

不輕汝。而與我等授記，當得作佛。我等不用如是虛妄授記。如此經歷多年，常被罵詈，不生瞋恚。常作是言：汝等當作佛。

（妙法蓮華經，第六常不經品）盈一四四左

在家菩薩住人衆中

復次：長者！在家菩薩，若在村落，城邑，郡縣，人衆中住；隨所住處，爲衆說法。不信衆生，勸導令信。不孝衆生，不識父母沙門，婆羅門，不識長幼，不順教誨，無所畏避，勸令孝順。若少聞者，勸令多聞。慳貪，勸施。毀禁，勸戒。瞋者，勸忍。懈怠，勸進。亂念，勸定。無慧，勸慧。貧者，給財。病者，施藥。無護，作護。無歸，作歸。無依，作依。

（大寶集經，卷第八十二郁伽長者會）地五八右

並行七事

道有七事。一者，意喜布施，不欲餘。二者，但欲聞。三者，但信。四者，但持戒。五者，但欲行。六者，欲學慧。七者，但欲脫去。佛在世時，得脫。轉後世，但學慧。復轉後世，但欲行。復轉後世，但持戒。復轉後世，但信。復轉後世，但欲聞。復轉後世，但欲布施。不但布施，當復聞。不但聞，當復信。不但信，當復持戒。不但持戒，當復行。不但行，當復慧。不但慧，當復脫去。是七事當並行。

（三慧經）藏八
二五
右

何謂知人

何謂知人？如有兩人：一人信道，一人不信道；信道者，可稱譽；不信者，無稱譽。信道有兩輩：一人數詣道場樂沙門，一人不數詣道場智略沙門；數詣可稱譽，不數詣者無稱譽。數詣道場有兩輩：一人愛敬沙門，一人不愛敬

沙門；愛敬者可稱譽，不愛敬者無稱譽。愛敬有兩輩：一人親習沙門，一人不親習沙門；親習者可稱譽，不親習者無稱譽。親習有兩輩：一人好問經法，一人不好問經法；好問者可稱譽，不好問者無稱譽。好問有兩輩：一人側耳聽，一人不側耳聽；側耳聽者可稱譽，不側耳聽者無稱譽。側耳聽者有兩輩：一人聞法受持，一人聞法不受持；聞法受持者可稱譽，不受持者無稱譽。受持有兩輩：一人聞而思義，一人聞不思義；聞而思義者可稱譽，聞而不思義者無稱譽。聞法思義有兩輩：一人如經義解，受法如法立，一人不如經義解，不受法不如法立；如經義解者可稱譽，不如經義解者無稱譽。如經義解者有兩輩：一人但自安己，不安他人，不多安人，不哀世間，不利天下；一人自能安己，亦安他人，多安天下，愍傷世間，利寧天人。

諸比丘當別知！其自安已，能安他人，多安天下，愍傷世間，利甯天下者；是人爲最上最長，最尊極尊。譬如牛乳成酪，酪爲酥，酥爲醍醐，醍醐最上。如是人者，爲人中之人，乃爲上行尊行，極尊之行，爲最勝，爲上願無上也。諸比丘！能見兩人爲智爲高，能分別此人善，此人勝，是爲知人。

（七知經）是八右

難遇五寶

告諸離車：世有五寶，甚爲難遇。一者諸佛世尊。二者善說佛所說法。三者聞法善解。四者如聞能行。五者不忘小恩。

（五分律，卷第二十第三分之五衣法上）張二二三左

【略注】①離車 Licchāvī——毗舍離城中之氏族也。世尊時代，其族頗盛。

丙、日常用心

四攝法

菩薩四攝，亦不可盡。云何爲四？一者布施。二者愛語。三者利行。四者同利。云何布施？施有二種：財施、法施。云何愛語？於求財人及聽法者，柔和與語。云何利行？於求財人及聽法者，隨其所求，悉令滿足。云何同利？求財法者，以大乘已利，令彼安止。

（大集經，卷第二十九無盡意菩薩品）玄二六三
右

四種菩薩行

出家菩薩，具四種法，於菩薩行，得不退轉。云何爲四？一者布施。二者愛語。三者利行。四者同事。善男子！如是四行，趣菩提路，利生根本。一切菩薩，皆

應修學。

（心地觀經，第七功德莊嚴品）字二七五右

【略注】①四種法——又稱四行。或稱四攝。②利行——或作利益，利他之行業也。③

同事——捨己而參與他人之事也。

增長菩提四法

若菩薩成就四法，能攝菩提，亦令增長。何等爲四？一者淨心。二者深心。三者方便。四者不捨菩提之心。是名爲四。

復有四法：一者布施。二者愛語。三者利益。四者同事。是名爲四。

復有四法：一者知諸行無常。二者決定知陰是苦。三者定知諸法，而無有我。四者定知涅槃，是寂滅法。是名爲四。

復有四法：一者得利不喜。二者失利不憂。三者雖有名譽，其心常等。四者

雖聞惡名，心亦不惱。是名爲四。

復有四法：一者知己。二者知他。三者知時。四者知義。是名爲四。

（轉女身經）字九_七左_二

有四法不斷佛種

菩薩有四法，不斷佛種。何等爲四？一者不退本願。二者言必施行。三者大欲精進。四者深心行於佛道。是爲菩薩有此四法，不斷佛種。

（思益梵天所問經，四法品第二）字一三_右

末世中得解脫四法

佛告彌勒菩薩言：『彌勒！若有菩薩，於後末世，五百歲中，法欲滅時，當成就四法；安隱無惱，而得解脫。何等爲四？所謂於諸衆生，不求其過。見諸菩

薩，有所違犯，終不舉露。於諸親友，及施主家，不生執著。永斷一切蠱穢之
言。彌勒！是爲菩薩於後末世，五百歲中，法欲滅時，成就四法，安隱無惱，而
得解脫。』爾時世尊欲重宣此義，而說偈言：
不求他過失，亦不舉人罪；
離麤語慳恡，是人當解脫。

（大寶積經，卷第九十一發勝志樂會）地五四六右

丁、傳道

富樓那之西方傳道

富樓那白佛言：『世尊！我已蒙世尊略說教誡，我欲於西方輸盧那人間
遊行。』佛言：『富樓那！西方輸盧那人，凶惡輕躁，弊暴好罵。富樓那！汝若
聞彼凶惡輕躁，弊暴好罵毀辱者，當如之何？』富樓那白佛言：『世尊！若

彼西方輸盧那國人，面前凶惡訶罵毀辱者，我作是念：彼西方輸盧那人，賢善智慧，雖於我前，凶惡弊暴，好罵毀辱，猶尙不以手石而見打擲。佛告富樓那：『彼西方輸盧那人，但凶惡輕躁弊暴罵辱於汝，則可脫復當以手石打擲者，當如之何。』富樓那白佛言：『世尊！西方輸盧那人，脫以手石加於我者，我當念言：輸盧那人賢善智慧，雖以手石加我而不用刀杖。』

佛告富樓那：『若當彼人脫以刀杖而加汝者，復當云何？』富樓那白佛言：『世尊！若當彼人脫以刀杖而加我者，當作是念：彼輸盧那人，賢善智慧，雖以刀杖而加於我，而不見殺。』

佛告富樓那：『假使彼人脫殺汝者，當如之何？』富樓那白佛言：『世尊！

若西方輸盧那人脫殺我者，當作是念：有諸世尊弟子，當厭患身；或以刀自殺，或服毒藥，或以繩自繫，或投深坑。彼西方輸盧那人，賢善智慧；於我朽敗之身，以少作方便，便得解脫。』佛言：『善哉！富樓那！汝善學忍辱，汝今堪能於輸盧那人間住止。汝今宜去，度於未度，安於未安，未涅槃者，令得涅槃。』

爾時富樓那，聞佛所說，歡喜隨喜，作禮而去。

（雜阿含經第十三）辰二七二左

不請之友

爲護法城，受持正法，能師子吼，名聞十方；衆人不請，友而安之。

（維摩經，佛國品第一）黃七一四右

不請之友

爲諸庶類，作不請之友。荷負羣生，爲之重擔。

（無量壽經，卷上）地八一八右

菩薩能代衆生受諸苦惱

爾時佛告等行菩薩：若菩薩能代一切衆生，受諸苦惱，亦復能捨一切福事，與諸衆生。是名菩薩。 （思益梵天所問經，談論品第七）字一十三右

如來室如來衣如來座

如來室者，一切衆生中，大慈悲心是。如來衣者，柔和忍辱心是。如來座者，一切法空是。 （妙法蓮華經，第四法師品）盈一三〇左

無盡燈

無盡燈者，譬如一燈，然百千燈；冥者皆明，明終不盡。夫一菩薩，開導百千衆生，令發阿耨多羅三藐三菩提心。於其道意，亦不滅盡；隨所說法，而自增益一切善法。是名無盡燈也。

（維摩經，菩薩品第四）黃七一九右



中華民國二十五年九月初版發行

▲全一册定價貳角伍分

(外埠酌加郵匯費)

佛教
聖典
之二

修持篇

編纂者 蔡淡 廬

出版者 佛學書局代表沈彬翰

印刷者 國光印書局
上海新大沽路口 電話三三七四三

總發行所 上海佛學書局
愚園路一五四號 電話三五五二四

分發行所

- 一、上海：麥特赫司脫路
- 二、上海：開北新民路中
- 三、上海：望平街有正書局
- 四、長沙：玉泉街七十號
- 五、杭州：西湖龍翔橋
- 六、北平：西安門大街
- 七、福州：下南路二十四號

暨各省佛經流通處

